

Emuth na Bër i kom Yecu kite na Marako öcöö

Köp na ut i buk ka Marako

Buk ni Jon Marako enë öcöö. Obedo buk acël i kin buke angwën na mïö onu köp i kom Emuth na Bër i kom Yecu Kiricito. Buke nökënë enë Matayo, Luka, ëka Jon. Marako nen calö obedo ki gum më nënë ëka winyo Yecu ki i Jerucalem cë ki kunön öcakö bedo ngat n'oye. Kinge enwongo nï en owotho ki Paulo ëka Baranaba i wothgi më acël (Tic k'Ëkwëna 12:25). Ën thon obedo amïi kõny both akwëna Petero pi mwaka na pol (1 Petero 5:13). Enwongo nï en onwongo köp na pol ki kom köp mërë i kom Yecu ki i kom ngö na Petero okobo nënë.

Ï buk ni, Marako mïö köp i kom kwö ëka tic ka Yecu. Ën oketho cwinye rwök i kom ngö na Yecu otio nakaka ngö na en okobo. Ën obedo ka nwönö nï Yecu nyutho tükö mërë më larö, gönyö ëka cangö jïi. Neno mërë onwongo tye i kom Yecu na calö atic ëka athin k'Obanga. Tango mërë, cangö jïi, gönyö jïi na tipo na reco otweogi ëka tükö mërë më wëkö bal nyutho en na calö wod k'Obanga.

Buk ni cakërë ki köp i kom tic ka Yecu i kin lwak, ëka ki köp mërë nï ker k'Obanga dong obino ökö pïny i lobo. Pol karë Marako tero köp më guro Yecu i kor yath na calö köp më rïbërë i kin Obanga ki dhanö. Na lübërë ki köp ka Marako, Yecu onwongo can pi bal onu (nën cura 8:31; 9:31; 10:33-34, 45). Marako onyutho ngö n'ötimërë na thuth i cabit më

ajiki na bara Yecu öthöö ëka ojiko köp mërë kî cer
ëka dök ka Yecu î wi polo.

Pwony ka Jon Abatica

(Matayo 3:1-12; Luka 3:1-18; Jon 1:19-28)

¹ Man ënë acaki më Emuth na Bër î kom Yecu
Kiricito, Wod k'Obanga.*

² Kite n'ëcöö ködë î buk k'adwarpïny Icaya:
“Obanga okobo nî, ‘An abino oro aorna î nyimi,
na bino yübö yoo nini.’

³ Dwön dhanö mörö tye ka redo î thim nî,
‘Yüb unu yoo pî Rwoth,
mîi unu yoo ocung atîr nîné.’ ”

⁴ Aor ni onwongo obedo Jon Abatica. Ën on-
wongo tye î thim ëka ötitö nî jîi myero ebaticagî
më nyutho nî gîn dong ongut ökö kî î kom balgî ëka
ölökërë gîni both Obanga ëk ötim nîgî kîca.

⁵ Jö na pol më lobo Yudea ëka Jerucalem obino
gîni both Jon. Gîn onwongo tuco balgî ëka Jon
baticagî î kulo Jordan.

⁶ Jon onwongo ruko böng n'ëyübö kî kom yer
kînaga, tweo wang pyërë kî del, camö bonyo ëka
mör kic më thim.

⁷ Jon ötitö both jîi nî, “Ngat mörö ute na tye ka
lübö kôra, ën pîrë tøk löa ökö. An ba apora më
gungo pîny ëka më gönyö thöl wörë.

⁸ An abaticawu kî pii, ëntö ën bino baticawu kî
Tipo Naleng.”

Batica ka Yecu

(Matayo 3:13-4:11; Luka 3:21-22; 4:1-13)

* **1:1** Baibul nökenë ba ketho *Wod k'Obanga*.

⁹ Ī karē nonu Yecu öya kī ĩ Najaret ĩ lobo mē Galilaya ēka Jon obatica ěn ĩ kulo Jordan.

¹⁰ Na Yecu pod donyo malō kī ĩ pii, cūcūth ěn ōnēnō polo öyabērē ēka Tipo Naleng opye ĩ kome na cal k'amam.

¹¹ Ēka dwōn mōrō öya kī ĩ polo na kobo nī, “In ěnē Woda mē amara, cwinya yom ĩ komi.”

¹² Cūcūth Tipo Naleng otero Yecu ĩ thim,

¹³ kanya ěn obedo ĩē pī nīnō pyer angwēn nakun Catan tēmō ěn. Leeni na ger onwongo thon ut kunōn ēka emalaika obedo gwökō ěn.

Yecu ocwodo ěcīk rēc angwēn

(Matayo 4:12-22; Luka 4:14-15; 5:1-11)

¹⁴ Ī karē na dong etweo Jon ĩ buc, Yecu obino yo Galilaya nakun tītō kōp ĩ kom Emuth na Bēr n'öya kī both Obanga.

¹⁵ ěn okobo nī, “Karē dong örömō, Ker k'Obanga dong cwök. Ngut unu ēka iyee unu Emuth na Bēr!”

¹⁶ Ī nīnō mōrō acēl na Yecu onwongo tye ka woth ĩ nget Nam mē Galilaya, ěn ōnēnō ěcīk rēc ariō, Cimon ēka ōmīn mērē Anderiya, bolo gīnī böögī ĩ pii.

¹⁷ Yecu okobo bothgī nī, “Bin ĩlūb unu kōra, ēka an abino mīōwu ĩdökō ěmak jīi nakaka rēc.”

¹⁸ Cūcūth gīn öwēkō böögī ēka ölübö gīnī kör Yecu.

¹⁹ Ī karē na ěn öcīdhō anyim na nōnōk, ōnēnō Yakobo ēka ōmīn mērē Jon, ěthīn ka Jebedayo, n'obedo gīnī ĩ yeya yübō böögī.

²⁰ Ēka cūcūth Yecu ocwodogī cē öwēkō gīnī apapgī Jebedayo ĩ yeya kī jō n'onwongo epangogī apanga ēka ölübö gīnī ěn.

*Dhanö na tye kî tipo na rac
(Luka 4:31-37)*

²¹ Yecu ëka ëlëbkörë öcïdhö gîni yo Kaperanaum, cücüth i ceng Cabît k'Eyuda ën ödönyö i cinagoga ëka öcakö pwony.

²² Jii obedo kî ur i kom pwony mërë, piën opwonyo na calö ngat n'onwongo ut kî twër, na path kî kite n'epwony cik pwonyo ködë.

²³ Cücüth dhanö mörö onwongo tye i cinagogagi kî tipo na rac ëka öcakö redo ni,

²⁴ “Kara imitö ngö kî bothwa, Yecu më Najaret? In ibino më tyekowa ökö? An angeo ngat na in ibedo—ngat na Leng n'Obanga ooro.”

²⁵ Entö Yecu ocoko nakun kobo ni, “Ling ökö, ëka donyi ökö kî i kome!”

²⁶ Tipo na rac ömïö ën öryërë ëka oredo rwök cë öya ökö kî i kome.

²⁷ Jö kibëc obedo gîni kî ur rwök nakun penyere gîni kën-gi ni, “Man ngö? Pwony na nyen na ut kî twër! Ën coko naka thon tipo na reco, ëka winyo gîni ën.”

²⁸ Emuth i kom Yecu ökëth örömö kabedo n'ögürö lobo më Galilaya kibëc.

*Yecu öcangö jö na pol
(Matayo 8:14-17; Luka 4:38-41)*

²⁹ Cücüth na Yecu dong öya ökö kî i cinagoga, öcïdhö gîn kî Yakobo ëka Jon yo pacö ka Cimon ëka Anderiya.

³⁰ Marö ka Cimon onwongo obuto piny, na two lyetho ömakö ëka cücüth gîn okobo köp i kome both Yecu.

³¹ Ēn dong öcīdhö bothe, ömakö cīngē, ēka otingo malö. Two lyetho öya ökö kī ī kome ēka öcakö yübö nīgī cem.

³² Kothyeno nōn na ceng dong dönyö, jīī okelo etwoe kibēc bothe ēka jö na cene ömakögi.

³³ Ēka jö kibēc mē pacö nōn ögürē gīnī ī dholokek.

³⁴ Cē Yecu öcangö jö na pol n'onwongo ut gīnī kī koth twoe na papath, ēka öryēmö cene na pol, ēn ba oyeo nī cene mē twak piēn gīn onwongo ngeo nga na ēn obedo.

*Yecu ötītö köp ī Galilaya
(Luka 4:42-44)*

³⁵ Kodiko cōn na pīny pod cöl, Yecu öya cē öcīdhö yo kanyalik ēka obedo ī lēga kunōn.

³⁶ Ēntö Cimon ēka ewodhe öcīdhö gīnī mē rangö ēn.

³⁷ Ī karē na gīn onwongo Yecu, gīn okobo nīnē nī, “Jö kibēc tye ka rangöni.”

³⁸ Ēntö Yecu okobo nīgī nī, “Eru ecīdh unu ī peci nökenē ek an thon atīt nīgī köp. Manōn ēnē gīn n'ömīö an abino.”

³⁹ Cē ēn owotho ī Galilaya kibēc nakun titö köp ī cinagogagi ēka ryēmö cene.

*Yecu öcangö ecwö na ut kī two dhöbū
(Matayo 8:1-4; Luka 5:12-16)*

⁴⁰ Ecwö mörö na ut kī two dhöbū obino cē orumo cōngē both Yecu, nakun kwaö ēn nī, “Ka imītö, itwērö mīöna bedo na leng.”

⁴¹ Kīca ömakö Yecu cē öryëö cīngē ogudo ēka okobo nīnē nī, “An amītö, komi dong obed na leng!”

⁴² Cücüth dhöbù orwenyo ökö kî i kome ëka ëmïö ödökö na leng.

⁴³ Cë Yecu ömïö ën öcïdhö nakun cïkö na tøk nï,

⁴⁴ “Kür ikob both ngat mörö ngö n'ötïmërë. Ëntö cïdhï inyuthiri both alamdhök ëka ïmïi tyër pï bedoni na leng na lübërë kî cïk na yam Muca öcïkö pï jö n'ëcangögi kî i two dhöbù. Man bino bedo caden both jö kïbëc nï in emii ïdökö na leng.”

⁴⁵ Ëntö ën öcïdhö ëka örwëö ngö n'ötïmërë both jö kïbëc. Na calö adwogi ka ngö n'ötïmërë, ömïö Yecu ba dökï ödönyö i pacö na kome nen ëntö obedo yökö kanyalik, cë jïi kî i kabedo kïbëc ömëdërë gïni më bino bothe.

2

Yecu öcangö ngat na kome okwe (Matayo 9:1-8; Luka 5:17-26)

¹ Kinge nïnö na nönök, Yecu dökï odwogo i Kaperanaum, jïi owinyo nï ën odwogo pacö.

² Lwak na pol öcökërë gïni kanya acël na kabedo ödökö na dïng naka i dholokek, ëka ën ötitö köp k'Obanga bothgi.

³ Cë cwö angwën obino n'otingo gïni dhanö na kome okwe bothe.

⁴ Gïn onwongo ba römö tero ëcwö ni both Yecu pïën lwak onwongo opong rwök. Otuco gïni wi öt kî malö n'opimere kî kanya Yecu onwongo ut ië. Cë gïn olwao ëcwö na kome okwe n'obuto i ökëka pïny i nyim Yecu. ⁵ I karë na Yecu önënö yeegi, okobo n'ëcwö na kome okwe nï, “Woda, balni dong ëwëkö ökö.”

⁶ Ēntö epwonye mökö më cîk ka Muca onwongo obedo kany nön nakun penyere gîni kî i cwinygi kën-gî nî,

⁷ “Pîngö dhanö ni twak nî köman? Ēn tye ka yanyö Obanga! Obanga kékën ënë twërö wëkö bal!”

⁸ Cücüth Yecu ongeo kî i cwinye ngö n'onwongo gîn tye ka thamö, ëka openyogi nî, “Pîngö ithamö unu köp ni kî i cwinywu?”

⁹ Mënë na yot, më kobo both dhanö na kome okwe nî, ‘Balni dong ëwëkö ökö,’ onyo nî, ‘Yaa malö, ikwany ökëkani, ëka icak woth’?

¹⁰ Ēntö an amîtö inge unu nî, Wod ka Dhanö ut kî twër i wi lobo më wëkö bal.” Cë Yecu okobo both dhanö na kome okwe nî,

¹¹ “An akobo nini, yaa malö, kwany ökëkani ëka icidh yo pacö.”

¹² Ēn öya malö, ökwanyö ökëka mërë ëka odonyo yökö na gîn kibëc tye ka nënö. Jö kibëc ouro ëka öpakö gîni Obanga na kobo gîni nî, “Wan anaka yam bara ënënö gin mörö na calö man!”

Yecu ocwodo Lebi

(Matayo 9:9-13; Luka 5:27-32)

¹³ Yecu dökî öcidhë i dhö Nam më Galilaya. Lwak na pol obino bothe ëka ën öcakö pwonyogi.

¹⁴ Na Yecu onwongo tye i woth, önënö Lebi wod k'Alipayo obedo i öd cökö ocoro mërë. Yecu okobo nî, “Lüb köra.” Cë Lebi öya malö ëka ölübö körë.

¹⁵ Na Yecu onwongo ut i cem i öt ka Lebi, ëcök ocoro ëka ëbal na pol onwongo tye i cem kanya acël ködë ëka ëlübkörë. Jö na pol onwongo tye n'öläbö gîni kör Yecu.

¹⁶ Ī karē n'epwony cĭk ka Muca n'obedo Eparicayo önənö gĭnĭ ěn ka cemo k'ēbal ēka ěcök ocoro, gĭn openyo ělūbkör Yecu nĭ, “Pĭngö ěn cemo k'ěcök ocoro ēka ēbal?”

¹⁷ Ī karē na Yecu owinyo köp nĭ, ěn okobo nĭgĭ nĭ, “Pathĭ jö na komgĭ yot ěnē mĭtö daktar, ěntö etwoe. An ba abino mē cwodo jö na kitegĭ atĭr ěntö ēbal.”

Peny ĭ kom rio kec

(Matayo 9:14-17; Luka 5:33-39)

¹⁸ Ī karē mörö n'onwongo ělūbkör Jon Abatica ēka Eparicayo ut gĭnĭ ĭ rio kec, jö mökö obino gĭnĭ both Yecu ēka openyo ěn nĭ, “Pĭngö ělūbkör Jon Abatica ēka ělūbkör Eparicayo rio gĭnĭ kec, ěntö megĭ ba rio kec?”

¹⁹ Yecu ögamö nĭ, “Wele k'anyom twērö rio kec n'anyom tye ködgĭ kanya acĕl?” Ba twērö gĭnĭ rio kec n'anyom tye ködgĭ kanya acĕl.

²⁰ ěntö karē bino thuno n'ebino kwanyö anyom ökö kĭ bothgĭ, cē gĭn dong bino rio kec ĭ nĭnö nön.

²¹ “Ngat mörö ope na dapö böngü na nyen ĭ kom böngü n'otĭi, cē ka ötĭmö, böngü na nyen bino yēcö böngü n'otĭi ökö cē mĭö kanya öyēc bedo na thwönē.

²² ěka ngat mörö ope na pĭkö köngö ölökö na nyen ĭ ocwe* na cön. Ka öpĭkö, cē köngö ölökö bino yēcö ocwe ökö, köngö ölökö bino öny ēka ocwe thon bal ökö. ěntö köngö ölökö na nyen myero ěpĭkĭ ĭ ocwe na nyen.”

Peny ĭ kom ceng Cabĭt k'Eyuda

(Matayo 12:1-18; Luka 6:1-5)

* **2:22** Eyuda pĭkö köngö ölökö ĭ ocwe n'ĕyübö kĭ ĭ kom pyen dyĕl.

²³ İ nīnō mōrō acēl mē ceng Cabīt k'Eyuda, na Yecu onwongo tye ka wok k'ēlūbkōrē i pwodho bēl, ēlūbkōrē ōcakō rīdhō with bēl.

²⁴ Eparicayo okobo both Yecu nī, “Nēn, pīngō gīn tye ka tūrō cīk i ceng Cabīt k'Eyuda?”

²⁵ Ēka Yecu okobo nīgī nī, “Un ba ikwanō kī i Cōc na Leng ngō na Daudi ōtīmō i karē na kec oneko ēn ēka ewodhe?”

²⁶ Ēn ōdōnyō i ōt k'Obanga i karē na Abiathar onwongo obedo Alamdhök na Dīt ēka ōcamō ogati n'ētyērō both Obanga na yam cīk ōkwērō nī dhanō mōrō kūr ōcam na path k'ēlamdhök kēkēn. Ēn thon ōmīō nōkēnē both ewodhe.”

²⁷ Cē Yecu okobo nīgī nī, “Ceng Cabīt onwongo ēyübō pī dhanō, pathī dhanō pī ceng Cabīt.

²⁸ Pī manōn Wod ka Dhanō obedo Rwoth, naka thon mē ceng Cabīt.”

3

Ēcwō na badē okwe

(Matayo 12:9-14; Luka 6:6-11)

¹ İ nīnō mōrō acēl mē ceng Cabīt k'Eyuda, Yecu dōkī ōdōnyō i cinagoga ēka ēcwō na badē okwe onwongo ut kunōn.

² Jō mōkō onwongo ut gīnī kunōn mē nēnō ka Yecu twērō cangō ēcwō nī i ceng Cabīt ēk enwong gīnī yoo mē dotho ēn.

³ Yecu okobo both ēcwō na badē okwe nī, “Yaa malō ēk icung i nyim jīi.”

⁴ Cē Yecu okobo bothgī nī, “Cīk yeo i ceng Cabīt nī ētīm gīn mōrō na bēr onyo na rac, ēlar kwō onyo enek ōkō?” Ēntō gīn ōlīng alīnga.

⁵ Ën önënögi k'akēmō ēka cwinye ocwer pī nwang cwinygī. Yecu okobo n'ēcwō nī, “Ryē badi.” Ën öryēō badē cē öcang ökö.

⁶ Cē Eparicayo odonyo gīnī yökō cücüth mē yübō köp kī jō na cwakō Erode kite na myero enek kī Yecu.

Lwak ölübö Yecu

⁷ Yecu k'ëlübkörē öya cē öcīdhō gīnī yo dhō nam, ēka lwak na pol n'öya kī i lobo Galilaya, Yudea,

⁸ Jerucalem, Idemea, kukidē mē kulo Jordan, ēka kī i lobo n'örikō Turo kī Cidon ölübö gīnī körē. I karē na lwak na pol owinyo gīnī gin na kibēc na ën obedo ka timō, gīn obino bothe.

⁹ Yecu okobo n'ëlübkörē nī öyüb gīnī yeya nīnē, ëk kür lwak ödiē.

¹⁰ Ën onwongo öcangō jō na pol i nīnō nōn, cē jō kibēc na two onwongo dīrē gīnī mē gudo ën.

¹¹ Ka tipo na reco önēnō Yecu, podho gīnī pīny i nyime ēka kok gīnī nī, “In ibedo Wod k'Obanga.”

¹² Ëntō Yecu öcīkō tipo na reco nī kür okob gīnī nī ngat mörō nga na ën ebedo.

Yecu öyērō ëkwēna apar ariō

(Matayo 10:1-4; Luka 6:12-16)

¹³ Kinge manōn Yecu öcīdhō i wi kidi ēka ocwodo jō n'onwongo ën mītō woth ködgi ēka obino gīnī bothe.

¹⁴ Ën öyērō jō apar ariō ēka ocwodogī nī ëkwēna ëk owoth ködē kanya acēl, ēka eorgī mē cīdhō titō köp k'Obanga,

¹⁵ ēka mē bedo kī twēr mē ryēmō cene.

¹⁶ Man ënē jō apar ariō na ën öyērō: Cimon (na ën öcakō nyīngē nī Petero),

17 Yakobo ëka ömîn mërë Jon, awope ka Jebedayo, (ëntö Yecu ömïögî nyîng nî, Boanergi, na tyën köp mërë nî, “Jö na mor kamë köth.”)

18 Anderiya, Pilipo, Batulumayo, Matayo, Tomaci, Yakobo wod k'Alipayo, Tadeo, Cimon (dhanö na mitö löckën)

19 ëka Yuda Ikariot n'oketho örörö i kom Yecu.

Yecu ëka Belijebul

(Matayo 12:22-32; Luka 11:14-23; 12:10)

20 Cë Yecu ödönyö i öt ëka lwak na pol obino örïkö ën dökî. Ën ëka ëlëbkörë onwongo ba twërö gîni nwongo caa më cem.

21 I karë na wede mërë owinyo ngö n'ötïmërë, cë obino gîni më makö Yecu piën gîn öthamö nî, “Ën opo ökö.”

22 Epwony cik ka Muca mökö öya kî i Jerucalem na kobo gîni nî, “Ën ut kî Belijebul, adwong ka cene. Kanya ën nwongo tükö kî ië më ryëmö cene.”

23 Cë Yecu ocwodogî ëka ötwak ködgî kî carolok nî, “Catan twërö ryëmö Catan nîngö?”

24 Ka ker opokere ië ariö, ker nön ba twërö cung.

25 Ëka ka jö më öt opokere ië ariö, jö më öt nön ba twërö cung.

26 Ëka ka Catan opokere cë ölwënyö i kome kënë, ën ba twërö cung, ajiki mërë nwongo dong othuno.

27 Ngat mörö ope na twërö dönyö i öt ka ngat na tük më yakö jami mërë, thwara ka ën öcakö tweno dhanö na tük ni ökö ëka dong cakö yakö jami kî i ödë.

28 An akobo niwu köp adyer nî, bal kibëc na dhanö timö ëka ayeny n'ëyanyö k'Obanga ërömö timö kîca,

²⁹ ëntö ngat mörö na yanyö Tipo Naleng ba ebino timö ninë kica piën nwongo ötimö bal na bedo na twal.”

³⁰ Yecu okobo nigï piën gin onwongo tye ka kobo ni, “Ën ut ki tipo na rac.”

*Aya ka Yecu ëka utmego mërë
(Matayo 12:46-50; Luka 8:19-21)*

³¹ Cë aya ka Yecu ëka utmego mërë obino ginï. Gin ocung yökö ëka eoro ngat mörö both Yecu i öt, ëk obin yökö ötwak ködgï.

³² Lwak onwongo obedo nakun ögürö ginï Yecu i dyere, cë ekobo ninë ni, “Ayani ëka utmegoni ocung yökö tye ginï ka rangöni.”

³³ Yecu ögamö nigï ni, “Nga ënë obedo ayana ëka utmegona?”

³⁴ Cë önönö jö n'obedo piny n'ögürö ën dyere ëka okobo ni, “Man ënë ayana ëka utmegona.

³⁵ Ngat mörö na timö ngö n'Obanga mitö, ënë ömëra, amëra, ëka ayana.”

4

*Carolok i kom acwö kodhi
(Matayo 13:1-9; Luka 8:4-8)*

¹ Yecu dökï öcakö pwony i dhö Nam më Galilaya. Lwak na pol rwök öcökërë bothe, cë ën öïdhö i yeya ëka obedo ië nakun jii kibëc odong i dhö nam.

² Yecu opwonyogi ki köp na pol ki carolok ni:

³ “Winy unu! Apur mörö öcïdhö më cwöönö kodhi mërë.

⁴ I karë na ën tye ka cwöönö kodhi, kodhi mökö ökir i dye yoo, ëka winy ödëdöpö ökö.

⁵ Kodhi nökënë ökir kanya obedo kitekite na ngöm nönök ië. Kodhi ni otuu pïöpïö piën ngöm onwongo rëp.

⁶ Ëntö i karë na ceng öryëny öwangögï rwök, oner gïni ökö piën oriigï ba ödönyö na thuth.

⁷ Kodhi nökënë opodho i kin okudhi. Okudhi ödöngö ëka ödiögï cë ba önyakö nyige.

⁸ Kodhi nökënë opodho i ngöm na bër ödöngö ëka nyige önyak, mökö pyer adek, mökö pyer abicël ëka mökö mia acël.”

⁹ Cë Yecu okobo ni, “Ngat na tye ki ithe më winyo, myero owiny.”

Pwony i kom carolok

(Matayo 13:10-17; Luka 8:9-10)

¹⁰ I karë na Yecu onwongo tye kënë k'ëlübkörë apar ariö ëka jö nökënë, gïn openyo ën tyën carolok.

¹¹ Ëka ën okobo nigï ni, “Müng më ker k'Obanga ëmiöwu. Ëntö both jö nökënë an atwak ködgï ki carolok,

¹² ëk,
 “ ‘Ka gïn önënö, önën gïni
 ëntö ba bino gïni nïang.
 Ka gïn owinyo, owiny gïni
 ëntö gïn ba bino nïang ië.
 Piën ka gïn ötïmö, gïn bino lökërë both Obanga,
 ëka ën bino tïmö nigï kïca.’ ”

Yecu ögönyö carolok k'acwö kodhi

(Matayo 13:18-23; Luka 8:11-15)

¹³ Cë Yecu openyogï ni, “Un ba inïang i tyën carolok ni? Un ibino nïang i carolok nökënë kibëc nïngö?

¹⁴ Apur cwö kodhi na ënë köp k'Obanga.

15 Kodhi n'opodho i yoo ocung pi jö na winyo köp k'Obanga, cê cücüth Catan bino kwanyö köp na gin owinyo ökö.

16 Kodhi n'opodho kanya obedo kitekite, ocung pi jö na winyo köp k'Obanga ëka cücüth gamö ginî ki yom cwiny.

17 Ëntö kit na ba ut ginî k'orii n'ödönyö na thuth, ba bedo ginî ape. Podho ginî ökö cücüth ka tye ginî ki pëkö onyo ka eketho ayela i komgi pi yee köp k'Obanga.

18 Kodhi nökenë n'opodho i kin okudhi ocung pi jö na winyo köp k'Obanga,

19 ëntö par më kwö më lobo ni, marö lönyö, ëka miti më jami kibëc bino cê diö köp k'Obanga ökö ëka ba nyak ginî.

20 Ëntö kodhi n'opodho i ngöm na bër cung pi jö na winyo ëka gamö köp k'Obanga. Gin nyakö nyig-gi pyer adek, mökö pyer abicël onyo mia acël."

*Carolok i kom tara
(Luka 8:16-18)*

21 Yecu okobo both lwak ni, "Ngat mörö ute na cwinyü tara cê ketho i thë adita onyo i thë ëtana ëka ba ketho i ka cibo tara?"

22 Piën ba tye gin mörö n'ökanërë na ba ebino ngeeno, ëka müng mörö ope na ba ebino kelo kanyalër.

23 Ka ngat mörö tye ki ithe më winyo, myero ën owiny."

24 Yecu thon okobo nigî ni, "Gwökërë unu ki kom gin ni winyo unu. Gin na un ipimo ködë, ënë thon ebino pimo niwu ködë, ëka dökî ebino mëdö niwu.

²⁵ Jö na tye kî gin mörö ebino mädö nîgî, ëka jö n'ope kî gin mörö ebino kwanyö naka thon gin mörö na tidî na gîn tye ködë ökö.”

Carolok i kom tuu ka kodhi

²⁶ Yecu ömädërë më kobo nî, “Ker k'Obanga cal k'apur n'öcwö kodhi i ngöm.

²⁷ Kiceng ëka kiwor, na ën önînö onyo neno, nyig kodhi tuu ëka döngö, ëntö ën ba nîang kit na nwongo ötimërë ködë.

²⁸ Ngöm mîö nyig kodhi tuu ëka nyakö nyige kënë, më acël pote cakö donyo, cë wie yübërë, ëka ajiki mërë nyige cëk.

²⁹ I karë na nyige öcëk, apur cakö bino ëka kaö kî pala, piën karë më kac nwongo örömö.”

Carolok i kom nyig kodhi karadali

(Matayo 13:31-32,34; Luka 13:18-19)

³⁰ Yecu dökî openyo nî, “Ngö na onu ebino poro kî Ker k'Obanga onyo carolok mënë na onu myero etii ködë?

³¹ Cal kî nyig kodhi karadali na ënë tidî rwök kî kin kodhi n'ëpidhö i ngöm.

³² Ëntö ka ëpidhö, döngö na thwönë rwök na löö kodhi nökenë kibëc n'ëpidhö i pwodho. Jangë döngö na boco, ëka wîny na ngwëcö kî malö twërö gërö udigî cë yweo i tipo mërë.”

³³ Yecu ötitö köp mërë both lwak nakun tio kî carolok, okobo nîgî kite na gîn twërö nîang ködë.

³⁴ Ën ba okobo gin mörö bothgî na ba otio kî carolok, ëntö ka ën ut kënë k'ëlübörë, ën gönyö nîgî jami kibëc.

*Yecu öjukö yamö
(Matayo 8:23-27; Luka 8:22-25)*

³⁵ İ nîñö nön na pîny dong cido, Yecu okobo both ëlûbkörë nî, “Eru engolu nam yo löka nam tung ca.”

³⁶ Cë gîn otero Yecu i yeya ëka öcakö gîni wëkö lwak i ngeegi. Yeya nökënë thon onwongo tye kanya acël ködë.

³⁷ Ëka yamö na ger obino i nam. Pii na tingere malö öcakö dönyö i yeya, ëka yeya öcakö pong ki pii.

³⁸ İ caa nön, Yecu onwongo tye ka nîñö i ngee yeya n'otheno wie k'athen wic. Ëlûbkörë ocoo ën ëk öya malö, na redo gîni nî, “Apwony, in ba iparö nî wan ëcwök lüny ökö i pii?”

³⁹ Yecu öya malö ëka ocoko yamö cë okobo nî pii na tingere malö nî, “Lîng ökö! Cung moth!” Cücûth yamö ocung ökö, ëka jami kibëc öllîng moth.

⁴⁰ Cë Yecu openyo ëlûbkörë nî, “Pîngö un ilwor? Un ba itye ki yee?”

⁴¹ Ëlûbkör Yecu onwongo ödökö gîni na lwor ökö. Cë öcakö penyere gîni kën-gî nî, “Ëcwö ni ënë nga, na naka thon yamö ëka pii na tingere malö winyo?”

5

*Yecu öcangö dhanö na tye ki tipo na rac
(Matayo 8:28-34; Luka 8:26-39)*

¹ Cë Yecu ëka ëlûbkörë öngölö Nam më Galilaya ëka othuno gîni yo löka nam më lobo Gereca.

² İ karë na Yecu donyo yökö ki i yeya, dhanö mörö na tye ki tipo na rac öya ki i wilyene më romo ködë.

³ Dhanö ni onwongo bedo i kin lyene ëka ngat mörö onwongo ope na twërö tweno ën kadï kï jëgëlë.

⁴ Pol karë etweo tyënë kï cingë ëntö caa kibëc ën codo jëgëlë ëka türö nywenyo ökö kï i tyënë. Ngat mörö onwongo ope na tæk na twërö löönö ën.

⁵ Karë kibëc kiceng ëka kiwor ën bedo i kin lyene ëka i wi kite nakun kok, ëka ngöngölö kome kënë kï kite.

⁶ I karë na ën önönö Yecu kï kanya bobor, öringö bothe cë orumo cöngë i nyime.

⁷ Ën öcakö redo rwök nï, “Yecu, Wod k'Obanga na Malö Rwök, ngö na in imitö kï botha? Kwongiri i nyim Obanga nï ba ibino pwodona!”

⁸ Pïen Yecu onwongo okobo nïnë nï, “Yaa ökö kï kom ëcwö nï, in tipo na rac!”

⁹ Cë Yecu openyo tipo na rac nï, “Nyingi nga?”

Ën ögamö nï, “Nyïngwa Lejon, pïen wan etye na pol i dhanö nï.”

¹⁰ Tipo na reco dök ökwaö Yecu rwök ëk kür öryëmgi ökö kï i lobo nön.

¹¹ Öthïpan pün onwongo tye ka cem i bad kidi.

¹² Cë tipo na reco ökwaö gïni Yecu nï, “Or-wa i pün, ëk ëdöny i igi.”

¹³ Cë Yecu oyeo nigï, ëka tipo na reco odonyo ëka ödönyö gïni i pün. Öthïpan pün onwongo tye na römö elip ariö. Pün öngwëcö gïni kï i bad kidi yo i nam cë pii ömwönyögi ökö.

¹⁴ Ëkwath n'onwongo kwaö gïni pün öngwëcö gïni ökö ëka örweö gïni emuth i pacö na cwök ëka kï lobo n'ögürö kany nön. Jïi öbünyö cidhö më nönö ngö n'ötimëre.

15 Ī karē na lwak obino both Yecu, gīn önönö dhanö n'onwongo tipo na reco opong ĩ kome, obedo pīny kunön n'oruko böng mērē ēka wie tye na bër, cē lworo ömakögi kibēc.

16 Ēka jö n'önönö ngö n'ötimērē, okobo gīni both jö nökenē köp ĩ kom dhanö na tipo na reco opong ĩ kome, ēka ĩ kom pūn.

17 Cē lwak öcakö kwaö Yecu ek öya ökö ki ĩ lobogi.

18 Na Yecu dong tye ka dönyö ĩ yeya, dhanö n'onwongo tipo na reco tye ĩ kome, ökwaö en nī ek ewoth ködē.

19 Entö Yecu ba oyeo. Okobo ninē nī, “Cīdh yo pacö ēka both jö na megī cē ikob nīgi jami kibēc na Rwoth Obanga ötimö ēka kit na en ötimö nini kīca ködē.”

20 En öcīdhö cē öcakö kobo ngö na Yecu ötimö ĩ kome ĩ Dekapoli* ēka jö kibēc n'owinyo ngö na en okobo, obedo gīni ki ur rwök.

*Nyaka Yairo ēka dhakö n'ogudo böngü ka Yecu
(Matayo 9:18-26; Luka 8:40-56)*

21 Ī karē na Yecu dōki öngölö nam ki yeya yo löka nam tung ca, lwak na pol öcökērē bothe nakun en onwongo tye ĩ nget nam.

22 Cē atēla mörö acēl mē cinagoga, na nyīngē Yairo obino. Ī karē na en önönö Yecu, orumo cōngē pīny,

23 ēka odweko en nī, “Nyara na tīdī dong tye ka thöö athöa. Öma! Bin iketh cingi ĩ kome, ek öcang cē ökwö.”

* 5:20 *Dekapoli* Gönyö nī peci apar.

24 Yecu owotho kanya acël kî Yairo. Lwak na pol ölübö ën nakun ëdiö ën.

25 Dhakö mörö onwongo tye na remo obedo cwer kî i kome pî mwaka apar ariö na ba cok.

26 Ën ölimö can na thwönë, ëka öbalö lim mërë kibëc n'onwongo ën ut ködë më cülö daktae na pol. Ëntö two mërë ömëdërë amëda na ba öcang.

27 I karë na ën owinyo köp i kom Yecu, obino kî kungee nakun wok kî kin jii ëka ogudo böngü ka Yecu,

28 piën ën onwongo öthamö pirë kënë ni, “Ka atwëro gudo böngü mërë këkën, an abino cang.”

29 Cücüth remo na cwer ocung ökö, ëka ongeö kî i kome ni ën ëcang ökö kî kom can mërë.

30 I caa nonu cücüth, Yecu ongeö ni tükö öya kî i kome. Ën ölökerë both lwak cë openyo ni, “Nga n'ogudo böngüna?”

31 Ëlübörë okobo ninë ni, “In inënö lwak tye ka diöni ëka dökî ipenyo ni nga n'ogudi?”

32 Ëntö Yecu ölökerë më nënö nga n'ogude.

33 Cë dhakö ongeö ngö n'ötimërë i kome, obino na kome myël kî lworö ëka orumo cöngë i nyim Yecu cë ën okobo köp n'adyer kibëc bothe.

34 Yecu okobo both dhakö ni, “Nyara, yeeni ömiö idökö na bër. Cidh kî kuc ëka icang ökö kî kom twoni.”

35 Na Yecu onwongo pod twak ködë, cwö mörö obino kî i pacö ka Yairo, atëla më cinagoga. Gïn okobo ninë ni, “Nyari dong öthöö ökö. Kür dökî iyel apwony.”

³⁶ Ēntö Yecu onwongo owinyo ngö na gîn tye ka kobo ëka okobo both Yairo nî, “Kür ibed kî lworö. Bed kî yee këkën.”

³⁷ Cë Yecu ba oyeo nî ngat mörö më lübö körë na path kî Petero, Yakobo ëka Jon (ömin Yakobo).

³⁸ Ī karë na gîn obino ĩ pacö k'atëla më cinagoga, Yecu önönö jii na tye ka wöö kî koko.

³⁹ Ēn ödönyö ĩ öt ëka okobo nîgî nî, “Pîngö iwöö unu kî koko nî köman? Athîn ba öthöö, ëntö önönö anîna.”

⁴⁰ Lwak önyërö Yecu. Ēntö ěn öryëmögî kibëc yökö ëka ödönyö k'apap k'athîn, aya k'athîn ëka ëlübörë adek ĩ öt kanya anyaka nön onwongo obuto ië.

⁴¹ Yecu ömakö cîngë cë okobo nîne nî, “Talitha kumi,” na gönyö nî, “Athîn anyaka, yaa malö!”

⁴² Ēka cücüth anyaka öya malö ëka öcakö woth (ěn onwongo tye kî mwaka apar arïö), cë jii obedo kî thwön ur rwök.

⁴³ Yecu öcîkögî rwök nî kür ömii gîni ngat mörö onge ngö n'ötîmërë ëka okobo nîgî më müö nyakö nön gin mörö ëk öcam.

6

Ēkwërö Yecu kî ĩ Najaret

(Matayo 13:53-58; Luka 4:16-30)

¹ Yecu öya ökö kî kunön, ödök yo lobo thurgî ëka ëlübörë ölübö ěn.

² Ī ceng Cabît k'Eyuda, ěn öcakö pwony ĩ cinagoga. Jö na pol n'owinyo pwony mërë ouro gîni ëka openyo gîni nî, “Ēcwö ni onwongo ryëkö ni kibëc

kī kwene? Kit ryëkö mënë n'ëmïö ën? Ën tio tango nïngö?

³ Man pathi apaa bao, wod ka Maria ëka ömïn Yakobo, Yoce, Yuda, ëka Cimon. Amego mërë ba kwö i kin onu kany?" Cë gïn ökwërö yee i kome.

⁴ Cë Yecu okobo nigi ni, "Adwarpiny ewörö i kabedo kibëc na path ki i lobo më pacö mërë ëka i kin wede mërë ki jö më dyekalgï."

⁵ Yecu onwongo ba twërö tio tango mörö kunön, na path ki ketho cingë i wi etwoe mörö na nönök ëka öcangögi.

⁶ Ën obedo ki ur rwök piën gïn ope ki yee.

Yecu ooro ëlübörë apar ariö

(Matayo 10:5-15; Luka 9:1-6)

Cë Yecu owotho i pacö ki pacö, nakun pwonyo jii.

⁷ Ën ocwodo ëlübörë apar ariö kanya acël ëka öcakö orogi k'ariö ariö nakun miögi twër i kom tipo na reco.

⁸ Yecu okobo nigi ni kür owoth gini ki gin mörö i wothgi na path ki lüth ögölë. Kür ömak gini cem, ocwe ëka ciling i jëba.

⁹ Ën oyeo nigi më ruko wör, ëntö kür ömak gini böngü më alöka.

¹⁰ Ën okobo nigi ni, "Ka idönyö unu i öt mörö, bed unu kany nön naka ka ibino yaa unu ki kany nön.

¹¹ Ëntö ka ba ëgamöwu i kabedo mörö onyo ewinyowu, ka iya unu, têng unu apua më tyënwu* ëk obed caden bothgi."

* **6:11 Têng unu apua më tyënwu** nyutho ni Obanga ökwërö jö më pacö nön, piën gïn ökwërö winyo köp k'ëkwëna.

¹² Cē ēlūbkör Yecu öcakö cīdhö gīnī, nakun tītō gīnī nī jīī myero ongut gīnī kī kom balgī.

¹³ Gīn öryēmō cene na pol ēka ewiro etwoe na pol kī möö cē ēcangōgī.

Thöö ka Jon Abatica

(Matayo 14:1-12; Luka 9:7-9)

¹⁴ Rwoth Erode† owinyo köp ī kom Yecu piēn jō kibēc onwongo twakö köp ī kome. Jō mökö onwongo kobo nī, “Man myero obed Jon Abatica n'ocer kī ī lyēl. Manön ēnē ömiö ēn tye ka tio koth tango nī.”

¹⁵ Jō nökēnē okobo nī, “Ēn obedo adwarpīny Eliya.”

Jō nökēnē kobo nī, “Ēn obedo adwarpīny na cal k'edwarpīny mörö na cön.”

¹⁶ Ēntō ī karē n'Erode owinyo köp ī kom Yecu, okobo nī, “Man myero obed Jon! Ēcwö na an anguno ngute ēnē dōkī ocer ökö.”

¹⁷ Erode onwongo ooro acikari mē makö Jon ēka ketho ēn ī buc pī Kerodia, dhakö k'ömīn mērē Pilipo, piēn Erode onwongo ökwanyö Kerodia mē bedo dhakö mērē.

¹⁸ Jon obedo ka kobo n'Erode nī, “Cīk ka Muca ba yeo nī īkwany dhakö k'omeru ilök ödök megī.”

¹⁹ Kerodia obedo kī cwer cwiny ī kom Jon ēka ömitō mē neko ēn. Ēntō ba ötwērö,

²⁰ piēn Erode onwongo lworō Jon ēka ngeo nī ēn onwongo obedo dhanö na bër ēka ēcwö na leng, cē ēn ögwökö Jon na bër. Ēn onwongo marö winyo

† 6:14 Rwoth nī onwongo obedo Erode Antipa.

twak ka Jon kadī bed wie orubere, caa kibēc ěn mītō nī ewiny köp ka Jon.

²¹ Kerodia onwongo karē na bër ĩ nīnō n'Erode öyübō karama mē po pī nīnō n'enywölē ködē. Ěn ocwodo edite mērē, ětēla wi lwēny ěka edite mē Galilaya.

²² Ĭ karē na nyaka Kerodia obino ěka ömyël, ěn oyomo cwiny Erode ěka wele mērē. Erode okobo both nyakō nī, “Penya gin mörō kēkēn na in ĩmītō. An abino mīōnī.”

²³ Ěka ěn okwongere bothe nī, “An abino mīōnī gin mörō kēkēn na in ibino penyo kī botha, naka thon nucu mē kerna!”

²⁴ Anyaka ni öcīdhō both aya mērē cē okobo nīnē nī, “Ngō na myero apeny?”

Aya mērē okobo nīnē nī, “Peny wi Jon Abatica!”

²⁵ Anyaka ni öbünyō woth pīöpīō ödök cen both Erode ěka okobo nīnē nī, “Amītō ĩmīa wi Jon Abatica ĩ canīa kany ĩ caa ni!”

²⁶ Cē rwoth Erode obedo kī kumo rwök ěntō pī kwong na ěn okwongo ĩ nyim wele mērē, ömīō ěn ba twērō kwērō na nyaka nī.

²⁷ Cücüth rwoth ooro acikari na kürō pīny ĩ buc mē cīdhō nguno ngut Jon ěka okel nīnē wie. Acikari öcīdhō ĩ buc cē onguno wi Jon

²⁸ oketho ĩ canīa, ěka okelo ömīō both nyakō nī. Nyakō ni dong otero both aya mērē.

²⁹ Ĭ karē n'ělübkör Jon owinyo gīnī ngō n'ötīmērē, obino gīnī cē ökwanyō gīnī kome ěka ěcīdhō eiko ĩ bur lyël.

Yecu öpīdhō jö elip abic

(Matayo 14:13-21; Luka 9:10-17; Jon 6:1-14)

30 Ī karē n'ëkwēna odwogo gīnī both Yecu, gīn okobo nīnē gin na kībēc na gīn ötīmō ëka opwonyo.

31 Cē Yecu okobo nīgī nī, “Eru ecidhu yo kanya jīi ope iē ëk eywe na nōnōk.” Ēn okobo nī kōman pīēn jīi onwongo tye na pol na bino ëka cīdhō gīnī. Yecu ëka ëkwēna mērē ba obedo gīnī kī caa mōrō mē cem thon.

32 Cē gīn dong ödōnyō ĩ yeya ëka öcīdhō yo kanya jīi ope iē.

33 Ēntō jō na pol n'önēnōgī ka cīdhō, ongeogī ëka öngwēcō gīnī kī tyēn-gī kī kin peci cē öcakō thuno gīnī anyim nīgī.

34 Ī karē na Yecu donyo yökō kī ĩ yeya, ěn önēnō lwak jīi na pol ëka kīca ömakō ěn ĩ komgī, pīēn gīn onwongo cal kī rom n'akwathgī ope. Cē öcakō pwonyogī kī köp na pol.

35 Na pīny dong cwök yutho, ëlübör Yecu obino bothe ëka okobo gīnī nī, “Kany obedo kanyalik, ëka pīny thon tye ka cido.

36 Kob nī lwak ëk öcīdh gīnī kanya jō mökö kwō gīnī iē ëka ĩ kin peci na cwök ëk öwīl gīnī cem mōrō mē acama.”

37 Ēntō Yecu ögamō nī, “Miwugī gin mōrō mē acama.”

Gīn openyo Yecu nī, “In ĩmītō nī wan ëcīdh ëk etii kī denario mīa arīō mē wīlō ogati mē pīdhōgī?”

38 Cē Yecu openyogī nī, “Ogati adi na un iut ködē? Cīdh ĩnēn unu.”

Gīn odwogo ëka okobo gīnī nī, “Wan eut k'ogati abic ëka rēc arīō.”

39 Cē Yecu okobo n'ëlübörē ëk ömīi jīi obed gīnī pīny ĩ gurup ĩ lum na mar.

⁴⁰ Jii obedo piny i gurup me mia acelacel eka pyer abicabic.

⁴¹ Yecu okwanyo ogati abic eka rec ario, oneno malö i polo, eka olögö gum. Ce opoko i ogati eka omio both elubkörë ek opok gini both jii. En thon opoko rec ario i kin-gi kibec.

⁴² Gin kibec ocemo eka oyeng gini.

⁴³ Eka kinge, elubkör Yecu ocökö gini nginy ogati eka rec n'odong pong aditi apar ario.

⁴⁴ Wel cwö n'ocamö gini ogati onwongo tye elip abic.

Yecu owotho i wi pii

(Matayo 14:22-33; Jon 6:15-21)

⁴⁵ Cücüth kinge man, Yecu okobo n'elubkörë ek ödöny gini i yeya ek ocidh gini anyim yo löka Bethsaida, nakun en kobo both jii ek ödök gini pacö.

⁴⁶ Kinge na dong omotho jii, en ocidhö i lëga i wi kidi.

⁴⁷ Kothyeno na piny dong ocido, elubkör Yecu onwongo ut gini i yeya i dyere nam. Yecu onwongo odong kënë i ngöm.

⁴⁸ En oneno ni elubkörë onwongo tye gini i thwön can, na yelere gini me mio yeya cidhö anyim pien yamö onwongo tye ka yelogi. Na caa abungwën me kodiko dong römö, Yecu obino bothgi nakun tye ka woth i wi pii. En othëna me poth kalögi,

⁴⁹ entö i karë na gin oneno Yecu nakun tye ka woth i wi pii ki tyënë, gin okok rwök ki lworö n'othamö gini ni köde en obedo jwök.

⁵⁰ Gin kibec onwongo komgi othöö ökö i caa na gin oneno Yecu.

Ëntö Yecu ötwak ködgî cücüth nakun kobo nîgî nî,
 “Kür ibed unu kî lworö, bed unu na cwinywu tēk!
 An ēnön!”

⁵¹ Cē Yecu öidhö î yeya bothgî, ēka yamö ocung.
 Gîn kibēc ouro gîni rwök,

⁵² piēn gîn onwongo bara öniang î kom tango mē
 ogati. Cwinygî onwongo nwang rwök mē niang.

*Yecu öcangö jö na two î Genecaret
 (Matayo 14:34-36)*

⁵³ Kinge na dong öngölö gîni nam, Yecu ēka
 ëlübörē ocung gîni î löka nam î Genecaret ēka
 öywaö gîni yeya î lak nam.

⁵⁴ Î karē na gîn odonyo yökö kî î yeya, cücüth jîi
 öcakö ngeno ēn,

⁵⁵ cē öringö gîni î kabedo kibēc, na tingo gîni jö na
 two k'ökēka yo kanya gîn onwongo owinyo nî Yecu
 ut iē.

⁵⁶ Kanya kibēc na ēn cîdhö yo iē, î kin peci, peci
 na döngö, onyo î nget lobo, gîn okelo etwoe yo cuk.
 Gîn ökwaö ēn ēk ömîi etwoe ogud lak böngü mērē,
 ēka jö kibēc n'ogudo ebino ëcangögi ökö.

7

*Kite mē thēkwarö k'edong
 (Matayo 15:1-19)*

¹ Î nînö mörö acēl, Eparicayo mökö ēka epwony
 Cîk ka Muca n'öya gîni kî î Jerucalem, obino ēka
 öcökērē gîni both Yecu.

² Cē önönö gîni ëlübörē mökö na ba lübö cîk mē
 kwer mē lwökö cîng jö na bara ecemo.

³ Eparicayo ëka Eyuda kibëc ba cemo na bara ölwökö gîni cîng-gî kite na cîk më thëkwarö k'edong mitö ködë.

⁴ Ëka ka gîn odwogo kî i cuk, ba cemo gîni na bara ölwökö cîng-gî. Gîn thon lübö cîk më thëkwarö nökenë na pol na calö lwökö ekopo, aguli, ëka k'aguli më mola.

⁵ Eparicayo ëka epwony cîk openyo gîni Yecu ni, “Pîngö ëlëbkori ba lübö gîni cîk më kwer më thëkwarö k'edong ëntö cemo gîni kî cîng-gî na ba ëlwökö?”

⁶ Yecu ögamö ni, “Un etwodo! Adwarpîny Icaya onwongo odwaro köp n'atîr i komwu kite n'ëcöö ködë ni,

“ ‘Rok ni wöra gîni kî del dhögî,
ëntö cwinygî bor köda.

⁷ Wöra gîni nono,
pwony na gîn pwonyo obedo cîk ka dhanö.’

⁸ Un ikwërö lübö cîk k'Obanga ëka ilübö unu kite ka dhanö.”

⁹ Cë Yecu okobo bothgî ni, “Itye unu kî yodhi na bër më kwërö cîk k'Obanga, ëk ilüb unu kite më thëkwarö na mewu.

¹⁰ Muca yam okobo ni, ‘Wör apapni ëka ayani,’ ëka ni, ‘Ka ngat mörö öyanyö apap mërë onyo aya mërë, myero enek ökö.’

¹¹ Ëntö un ikobo ni ka dhanö mörö okobo n'apap mërë onyo aya mërë ni, ‘Gin n'onwongo myero akonyi ködë ënë lîm më Korban’ (na tyën köp mërë ënë ni gin n'ëmïö ökö both Obanga),

¹² cë ën kür dökî ömîi lîm mörö më könyö apap mërë onyo aya mërë.

13 Ì kit yoo ni, un ìkwërö köp k'Obanga ëka ìlübö unu kite më thëkwaröwu. Ëka ìtimö unu jami na pol na cal kî manön.”

*Gin na balö dhanö
(Matayo 15:10-20)*

14 Cë Yecu ocwodo lwak bothe dökî ëka okobo nigî nî, “Un kibëc winy unu köpna ëka ìniang unu ië.

15 Gin mörö ope na yaa kî yökö na dönyö ì dhanö na twërö balö ën, ëntö gin na yaa kî ì dhanö na donyo yökö ënë balö ën.

16 Ngat na tye kî ithe më winyo myero ën owiny.”*

17 Ì karë na Yecu öwëkö lwak ëka ödönyö ì öt, ëlëbkörë openyo ën tyën köp ì kom carolok nî.

18 Cë Yecu openyogî nî, “Un thon bara ìniang unu? Ba ingeo unu nî gin na kibëc na dönyö ì dhanö nakun öya kî yökö ba twërö balö ën?

19 Pïen ba dönyö naka ì cwinye, ëntö cïdhö ì jamïë cë donyo yökö.” (Na Yecu okobo köp nî, ën onwongo tye ka kobo nî cem kibëc opore më acama.)

20 Yecu ömëdërë më kobo nî, “Gin na yaa kî ì dhanö ënë balö ën.

21 Pïen gin n'öya kî ì dhanö, n'öya kî ì cwinye ënë thama na reco, tim më ölyang, kwalö kwo, nek,

22 elomi, woro më jami kibëc, tim mökö na reco, bwölö jïi, miti më kom, nyeko, yanyö jïi, awaka, ëka mingö.

23 Tim na reco nî kibëc yaa kî ì cwiny dhanö, ëka gin ënë balö dhanö.”

* 7:16 Baibul nököënë ba oketho tyeng nî.

*Yee ka dhakö mä Curopoiniki
(Matayo 15:21-28)*

²⁴ Yecu öya ökö kî kunön ëka öcîdhö i lobo Turo. Ën ödönyö i öt mörö ëka ba ömîtö nî ngat mörö onge, ëntö ën onwongo ba twërö kanërë.

²⁵ Cë dhakö mörö na nyarë onwongo tye kî tipo na rac i kome, owinyo köp i kom Yecu, cë obino ëka orumo cöngë i nyime.

²⁶ Dhakö ni onwongo obedo jö Girik n'ënywölö i Curopoiniki. Ën ökwaö Yecu më ryëmö tipo na rac ökö kî kom nyarë.

²⁷ Yecu okobo nîné nî, “Ëk kono ëthînö öcam ngö na gîn mîtö kibëc, piën ba opore më mîö cem k'ëthînö both gwongî.”

²⁸ Dhakö ögamö nî, “Rwoth ikobo adyer, ëntö gwongî thon na tye i thë mëja camö gîni ngîny cem k'ëthînö n'opodho pîny.”

²⁹ Cë Yecu okobo nîné nî, “Pî köp na in ikobo, irömö cîdhö yo pacö, piën tipo na rac dong öya ökö kî kom nyari.”

³⁰ Ën öcîdhö yo pacö ëka onwongo nyarë obuto i wi ëtana, ëka tipo na rac onwongo dong öya ökö kî i kome.

Yecu öcangö athöö ith na lëbë otwere

³¹ Cë Yecu öya ökö kî i lobo Turo ëka owok i Cidon yo Nam më Galilaya na tye i lobo Dekapoli.

³² Ëka lwak okelo ëcwö mörö bothe n'onwongo ithe öthöö ëka ba römö twak. Cë ökwaö gîni Yecu ëk oketh cîngë i kome.

³³ Kinge na Yecu otero ën thenge kî kin lwak, oketho nyi cîngë i ithe, ëka öngülö laö dhögë i cîngë cë ogudo lëbë.

³⁴ Yecu önənö malö i wi polo, öcür ëka okobo ni, “Epata,” na tyën köp mërë ni, “Yabiri!”

³⁵ Cücüth ëcwö ni öcakö winyo piny. Thë lëbë thon ögöny ökö ëka öcakö twak na bër.

³⁶ Yecu öcökö lwak ni, “Kür icidh ikob unu both ngat mörö ngö n'ötimërë.” Ëntö kadï bed öcökögï ni kömanön, gïn ömëdërë amëda më tütö ngö n'ötimërë.

³⁷ Lwak obedo ki ur rwök na kobo gini ni, “Gin na kibëc na ën ötimö bër. Ën thon miö ëthöö ith winyo piny ëka jö na thë lëbgï otwere më twak.”

8

Yecu öpïdhö jö elip angwën (Matayo 15:32-39)

¹ I karë nonu, lwak na pol döki ögürë ëka cem onwongo ope nigï. Yecu ocwodo ëlëbkörë bothe ëka okobo nigï ni,

² “Lwak othona gini rwök piën orio gini köda ninö adek na gin mörö më acama ope.

³ Ka aorogï pacö na ba öcamö gini gin mörö, kec bino miögï wile i yoo piën jö mökö ki kin-gï öya ki kanya bor.”

⁴ Ëka ëlëbkörë ögamö ni, “Kara wan ëtwërö nwongo cem na römö pïdhö lwak jö ni ki kwene na kany obedo thim?”

⁵ Yecu openyogï ni, “Ogati adi na un itye ködë?”
Gin ögamö ni, “Ogati abirö.”

⁶ Cë Yecu okobo ni lwak ëk obed gini piny. Ën ökwanyö ogati abirö, öpwöyö Obanga ëka opokogï, cë ömiö both ëlëbkörë ëk opok gini both lwak.

⁷ Gīn thon onwongo tye gīnī kī rēc ariö na thithinö. Yecu öpwöyö Obanga ëka okobo n'ëlübkörë ëk opokgī.

⁸ Jö kibēc ocemo naka oyeng gīnī. Ëka kinge cem, ëlübkör Yecu öcökö gīnī nginy cem n'ötütüra pong aditi abirö.

⁹ Jö n'onwongo tye kunön onwongo römö elip angwën. Cë Yecu okobo nī lwak ëk ödök gīnī pacö kinge cem.

¹⁰ Cücüth, Yecu ödönyö i yeya k'ëlübkörë ëka öcïdhö yo lobo Dalmanutha.

*Eparicayo ökwaö gīnī anyuth
(Matayo 16:1-6)*

¹¹ I karë n'Eparicayo mökö owinyo gīnī nī Yecu othuno, gīn obino ëka openyo gīnī Yecu anyuth n'öya kī i polo më tēmö ën.

¹² I karë na Yecu owinyo köp nī, öcür rwök kī i cwinye ëka okobo nī, “Pīngö jö më karë nī mütö gīnī anyuth më tango? An akobo niwu köp adyer, ba abino nyutho nī jö më karë nī koth anyuth mörö këkën.”

¹³ Cë Yecu öya ökö kī bothgī, ödönyö i yeya, ëka öngölö i nam yo löka tung ca.

*Thöbī k'Eparicayo ëka më k'Erode
(Matayo 16:5-12)*

¹⁴ Ëlübkör Yecu onwongo wigī owil ökö më makö ogati i wothgī. Gīn onwongo ömakö ogati acël këkën i yeya.

¹⁵ Cë Yecu öcïkögī nī, “Myero igwökërë unu kī kom thöbī k'Eparicayo ëka më k'Erode.”

16 Gîn öcakö twak i kin-gi kën-gi nî, “Ën tye ka kobo köp nî piën onu ba ëmakö ogati mörö.”

17 Yecu ongeon gö n'onwongo gîn tye ka twakö cë openyogî nî, “Pîngö itye unu ka twak nî ba imakö unu ogati mörö? Un pod bara inënö onyo iniang unu? Cwinywu pod nwang?”

18 ‘Itye unu kî wangwu cë ba ineno unu. Itye unu kî ithwu cë ba iwinyo unu piny.’ Ba itwëro unu po i kom gîn mörö kékën?

19 I karë na an apidhö jö elip abic k'ogati abic, aditi adi më nginyë n'odong na un icökö?”

Ëlückör Yecu ögamö nî, “Apar ariö.”

20 “Ëka i karë na an apidhö jö elip angwën k'ogati abirö, aditi adi më nginyë na un icökö?”

Cë gîn ögamö nî, “Abirö.”

21 Ëka Yecu openyogî nî, “Un pod bara iniang?”

Yecu öcangö athöö wang i Bethsaida

22 I karë n'othuno gîn i Bethsaida, jö mörö okelo athöö wang both Yecu, cë gîn ökwaö ën më gudo athöö wang.

23 Ëka Yecu ömakö cing athöö wang cë öpëö yökö i ngee pacö. Cë öngülö laö dhögë i wangë, oketho cingë i kome ëka openyo nî, “Itye ka nënö gîn mörö?”

24 Ëcwö ni önënö malö cë okobo nî, “Eyo, atye ka nënö jii, ëntö gîn tye ka nen kamë yen na tye ka woth.”

25 Cë Yecu dökî ogudo wang ëcwö ni ëka wangë öyabërë cë öcakö nënö jami kibëc na bër.

26 Yecu okobo ninë ëk öcidh yo pacö thurgî nakun cikö nî, “Kür icidh ikob nî ngat mörö kî i pacö.”

*Köp na Petero otuco i kom Yecu
(Matayo 16:13-20; Luka 9:18-21)*

27 Yecu ëka ëlëbkörë öya gini ki i Galilaya ëka öcïdhö gini i peci na cwök ki Cecaria Pilipi. Na gin onwongo tye i woth, ën openyogi ni, “Jii mönô kobo ni an abedo nga?”

28 Gin ögamö ni, “Jö mökö kobo ni in Jon Abatica, mökö kobo ni in Eliya, ëka jö nökenë kobo ni in ibedo ngat acël i kin edwarpiny.”

29 Cë Yecu openyogi ni, “Ëntö un kono, ikobo ni an abedo nga?”

Petero ögamö ni, “In ibedo Meciya.”

30 Ëntö Yecu öcïkögi ni kür okob gini ni ngat mörö köp i kome.

*Yecu okobo pi thöo mërë
(Matayo 16:21-28; Luka 9:22-27)*

31 Cë Yecu öcakö pwonyogi ni Wod ka Dhanö myero ölim can na pol ëka edong, ëlamdhök na dito, ëka epwony cik bino kwërö ën ökö. Ebino neko ën, ëntö kinge ninö adek ën bino cer ki i lyël.

32 Yecu ötwakö köp ni kanyalër both ëlëbkörë. Ëka Petero ökwanyö ën thenge cë öcakö coko Yecu pi kobo koth köp ni.

33 Ëntö Yecu öwïrë ëka önënö ëlëbkörë, cë ocoko Petero na kobo ni, “Dök i ngea, Catan! Pïen thamani ba lübö më k'Obanga ëntö më ka dhanö.”

34 Cë Yecu ocwodo lwak ëka ëlëbkörë bothe cë okobo ni, “Ka ngat mörö mitö bedo alëbköra, myero ën kono öcak kwërë kënë, oting yath aria mërë, ëka ölëb köra.

35 Ka ngat mörö mitö larö kwö mërë, bino rwenyo kwö mërë ökö. Ëntö ka ngat na rwenyo

kwö mërë pira ëka pī Emuth na Bër, bino larö kwö mërë.

³⁶ Ëka ngö na in ibino nwongo ka itye kī jami më lobo ni kibëc, ëntö irwenyo tiponi ökö?

³⁷ Onyo ngö na dhanö twërö mïö më lökö kī kwö mërë?

³⁸ Ka ngat mörö lewic makö ī koma ëka kī köpna ī karë ni na ba ëwörö Obanga ië ëka më bal, Wod ka Dhanö thon lewic bino makö ī kom dhanö nön ī karë na ën bino dwogo ködë kī dheo k'Apap mërë ëka më k'emalaika na leng."

9

¹ Ëka Yecu okobo bothgī nī, "An akobo niwu köp adyer nī tye jö mökö n'ocung kany na ba bino bilö gīnī thöo naka ka wang n'önönö gīnī ker k'Obanga ka bino kī tükö."

Kom Yecu ölökerë na path

(Matayo 17:1-13; Luka 9:28-36)

² Kinge nīnö abicël, Yecu ökwanyö Petero, Yakobo, ëka Jon cë öïdhö ködgī ī wi kidi na bor, kanya onwongo gīn tye ië kën-gī. Na gīn tye ka nēnö, kom Yecu ölökerë na path ī nyimgī,

³ ëka böng mërë ödökö na tar na ryëny rwök na ngat mörö kī wi lobo ba römö lwökö nī kömanön.

⁴ Cë Eliya ëka Muca onen bothgī ëka öcakö gīnī twak kī Yecu.

⁵ Petero okobo both Yecu nī, "Apwony, bër nī onu më bedo kany! Ëk ëgër othogo adek, acël na megī, acël më ka Muca, ëka acël më k'Eliya."

⁶ Petero onwongo ba ngeo ngö na myero ekobi pīen lworo onwongo ömakögī rwök.

⁷ Cē edou obino oumogī ökö, ëka dwön ötwak kī ī edou nī, “Man ënë Woda na an amarö. Winy unu ën.”

⁸ Athura, ī karë na gīn önënö ngetgī, gīn ba dökī önënö ngat mörö na path kī Yecu kēkën.

⁹ Na gīn tye ka idho pīny kī wi kidi, Yecu öcīkögī nī kūr okob gīnī nī ngat mörö ngö na gīn önënö, naka wang ka Wod ka Dhanö ocer kī ī thöö.

¹⁰ Gīn ba okobo ngö n'ötīmērë both ngat mörö, ëntö obedo penyere gīnī ī kin-gī kën-gī nī, “Ngö na ‘cer kī ī thöö’ gönyö?”

¹¹ Cē gīn openyo Yecu nī, “Pīngö epwony cīk ka Muca kobo gīnī nī Eliya myero kono öcak bino?”

¹² Yecu ögamö nīgī nī, “Adyer Eliya ënë cakö bino ëka dwökö jami kibëc kakarë. Cē pīngö Cöc na Leng kobo nī Wod ka Dhanö bino līmö can rwök ëka ebino kwërö ökö?”

¹³ Ëntö akobo niwu nī, Eliya dong obino ökö ëka jīi ötimö gīn na kibëc na gīn mütö ī kome, kite na Cöc na Leng kobo nī bino timërë ködë.”

*Yecu öcangö awobi na tye kī tipo na rac
(Matayo 17:14-20; Luka 9:37-43)*

¹⁴ Ī karë na Yecu k'ëlübkörë adek odwogo gīnī yo kanya ëlübkörë nökökënë onwongo ute gīnī ië, gīn önënö lwak na pol n'ögürögī dyere ëka epwony cīk ka Muca onwongo tye ka pyem ködgī.

¹⁵ Na lwak kibëc önënö Yecu, ouro gīnī rwök ëka öringö gīnī mē motho ën.

¹⁶ Yecu openyo ëlübkörë nī, “Ngö na un itye ka pyem ködgī ië?”

17 Dhanö mörö acël kî kin lwak ögamö nî, “Apwony, akelo woda bothi, piën ën ute kî tipo na rac na ba yeo nî ën ötwakî.

18 Ëka ka tipo na rac ömakö, rëdhö ën pîny na kome myël amyëla. Cë bwo yenyö kî i dhögë, kaö lakë na tæk ëka kome jîng ökö. Akwaö ëlëbkori më ryëmö tipo na rac, ëntö ryëmö ölöögï ökö.”

19 Yecu okobo nîgî nî, “Un wang rok na yeewu ope i kom Obanga! Abino bedo kodwu naka awene? Abino diö cwînya i komwu naka awene kara? Kel unu awobi nön botha.”

20 Cë gîn okelo awobi ni bothe. Ëntö i karë na tipo na rac önënö Yecu, oyuo awobi ni pîny cüth naka örakërë na lör alöra nakun bwo yenyö kî i dhögë.

21 Yecu openyo apap k'awobi nî, “Otero karë na röm kwene na gin ni obedo ka timërë bothe?”

Ën ögamö nî, “Anaka na ën pod tidî.

22 Tipo na rac rëdhö ën karë kî karë i mac onyo i pii, më tëmö neko ën ökö. Ëntö ka itwërö timö gin mörö, kîca omaki i komwa ëk ikönywa.”

23 Yecu okobo n'apap k'awobi nî, “Ka in itwërö! Jami kibëc twërö timërë both ngat mörö kékën na yee.”

24 Cücüth apap k'awobi okok kî redo nî, “An ayee, ëntö könja ëk abed kî yee na thwönë!”

25 I karë na Yecu önënö nî lwak tye ka ngwëc bino yo bothe, ën ocoko tipo na rac nî, “In tipo na ba mïö awobi ni twak ëka wînyo pîny, aciki më donyo yökö kî i kom awobi ni ëka kür dökî idöny i kome!”

26 Cë tipo na rac öcakö koko, ëka oyuo awobi ni pîny naka örakërë ëka odonyo yökö kî i kome.

Awobi ni onwongo dong cal kī lyël na jö na pol okobo nī, “Ën öthöo ökö.”

²⁷ Ëntö Yecu ömakö cingë ëka otingo ën malö cë ocung.

²⁸ Kinge na Yecu onwongo tye kënë i öt k'ëlübkörë, gīn openyo ën nī, “Pīngö wan ba ëryëmö cen?”

²⁹ Yecu ögamö nīgī nī, “Koth tipo na rac na calö man, ëtwërö ryëmö kī lëga këkën.*”

Yecu ötwakö köp i kom thöo mërë dökī

(Matayo 17:22-23; Luka 9:43-45)

³⁰ Yecu ëka ëlübkörë öya gīnī kī i kabedo nön ëka owok gīnī i lobo Galilaya. Ën onwongo ba mütö nī ngat mörö onge kanya gīn onwongo tye ië,

³¹ pīën onwongo mütö pwonyo ëlübkörë. Yecu okobo bothgī nī, “Wod ka Dhanö ebino ketho örörö i kome ëka ebino mīö i cingjö na bino neko ën. Ëntö kinge nīnö adek, ën bino cer kī i thöo.”

³² Ëntö ëlübkör Yecu ba öniang gīnī i ngö n'onwongo ën tye ka kobo, ëka gīn onwongo lwor më penyo ën.

Ngat na löö kī dit

(Matayo 18:1-5; Luka 9:46-48)

³³ Kinge na dong othuno gīnī i Kaperanaum, na gīn dong tye i öt, Yecu openyo ëlübkörë nī, “Ngö n'onwongo un itye ka pyem ië i yoo?”

³⁴ Ëntö gīn öling alinga, pīën gīn onwongo tye ka pyem i wanga yoo nī nga ënë löö kī dit kī kin-gī.

³⁵ Yecu obedo pīny, cë ocwodo ëlübkörë apar ariö bothe, ëka okobo nī, “Ka ngat mörö mütö bedo

* **9:29** Baibul nököënë ketho lëga ëka rio kec.

dhanö më acël, ën myero obed dhanö më ajiki ëka obed atic ka jö kibëc.”

³⁶ Cë Yecu ökwanyö athîn ëka oketho i dyeregî. Otingo athîn i kore, ëka okobo nîgi nî,

³⁷ “Dhanö mörö na bino gamö athîn na tidi na cal kî man kî nyînga, nwongo ôgama. Ëka dhanö mörö na gama, nwongo ba ôgama an këkën ëntö nwongo ôgamö Apapna n'oorä.”

*Tic kî nyîng Yecu
(Luka 9:49-50)*

³⁸ Jon okobo both Yecu nî, “Apwony, wan ënënö dhanö mörö ryëmö cene kî nyîngi, ëntö wan ëjükö ën piën onwongo ën ba tye kukur onu.”

³⁹ Yecu okobo nîgi nî, “Kür ijuku ën, piën dhanö mörö ope na tio tango kî nyînga ëka dökî cakö twakö köp na rac i koma.

⁴⁰ Ngat mörö këkën na ba dag onu, nwongo obedo akukur onu.

⁴¹ Ka ngat mörö ömïöwu pii më amodha piën un ibedo jö ka Kiricito, an akobo niwu köp adyer, dhanö nön ebino cülö.

*Gin na müö dhanö podho i bal
(Matayo 18:6-9; Luka 17:1-2)*

⁴² “Ka dhanö mörö ömïö ngat acël kî kin ëthînö ni n'oye i koma opodho i bal, bedo na bër ka etweo pong rego na thwönë i ngute cë ebolo ködë i nam.

⁴³ Cë ka cingi ënë müi itimö bal, ngun ökö. Bedo na bër rwök më dönyö i kwö kî cingi acël këkën na löö më dönyö i mac na ba thöö i kapiny kî cingi arïö.

⁴⁴ Kunön, kudi na camögi ba thöö, ëka mac na wangögi ba nekere.†

† 9:44 Baibul nököne ba ketho tyeng ni.

⁴⁵ Ka tyeni ënë teri i bal, ngun ökö. Bedo na bër rwök më dönyö i kwö kî tyeni acël na löö më boloni i mac kapîny kî tyeni ariö.

⁴⁶ Kanya kudigî ba thöo kî ië ëka mac thon ba nekere.‡

⁴⁷ Ëka ka wangi ënë müi itimö bal, köl ökö. Bedo na bër rwök më dönyö i Ker k'Obanga kî wangi acël këkën na löö më bedo kî wangi ariö cë eboli ködë i mac kapîny.

⁴⁸ Kanya
“ ‘kudigî ba thöo kî ië
ëka mac thon ba thöo.’

⁴⁹ Piën kadö na bino lönyö ngat acëlacël ënë mac.

⁵⁰ Kadö bër, ëntö ka orwenyo mit mërë ökö, itwëro müö dökö na mit nîngö dökî? Un myero ibed unu kî rwöm më kadö i kinwu ëka ibed unu kî kuc kî jö nökënë.”

10

Pwony i kom këthö nyom

(Matayo 19:1-12; Luka 16:18)

¹ Cë Yecu öya öwëkö Kaperanaum ëka öcïdhö yo kupîny i lobo Yudea ëka yo löka kulo Jordan. Lwak jö na pol obino dökî bothe, ëka na calö kite n'önaa timö ködë, ën opwonyogî.

² Eparicayo mökö obino bothe ëka ötëmö gîni ën nakun epenyo nî, “Cik yeo nî ëk ëcwö ökwër dhakö mërë?”

³ Yecu ögamö nakun penyogî nî, “Ngö na cik ka Muca kobo?”

⁴ Gîn ögamö nî, “Muca ömiö twër both ëcwö më cöönö waraga më kwër ëka öryëm ën ökö.”

‡ 9:46 Baibul nökënë ba ketho tyeng ni. 9:48 Icaya 66:24

⁵ Yecu okobo nigĩ nĩ, “Muca ömïöwu cĩk nön pĩ nwang cwinywu.

⁶ Ĕntö cakërë ĩ acaki ketho lobo ‘Obanga ocweo ěcwö ěka dhakö.’

⁷ ‘Pĩ tyën köp ni ěcwö bino wëkö apap mërë ěka aya mërë, cë rĩbërë kĩ dhakö mërë,

⁸ ěka gĩn ariö bino dökö kom acël.’ Cë gĩn ba dök bedo jö ariö, ěntö kom acël.

⁹ Pĩ manön, gĩn n’Obanga öribö kanya acël, dhanö mörö kür opok kin-gĩ.”

¹⁰ ĩ karë na gĩn onwongo tye ĩ öt dökĩ, ělũbkör Yecu openyo ěn ĩ kom köp na ěn okobo.

¹¹ Yecu okobo nigĩ nĩ, “Ka dhanö mörö ökwërö dhakö mërë, cë önyömö dhakö nökenë dökĩ, nwongo ěn ödönyö ĩ elomi.

¹² Ĕka ka dhakö ökwërö cwörë cë önyömerë k’ěcwö nökenë dökĩ, nwongo ěn thon ödönyö ĩ elomi.”

Yecu ölägö gum ĩ kom ěthĩnö

¹³ ĩ nĩnö mörö acël jö mökö okelo ěthĩnö both Yecu ěk ogudgĩ, ěntö ělũbkörë ocokogĩ.

¹⁴ ĩ karë na Yecu önënö, öngöö rwök. Ĕn okobo nigĩ nĩ, “Wëk unu ěthĩnö obin botha ěka kür ijukugĩ piën ker k’Obanga tye pĩ jö na calö man.

¹⁵ An akobo niwu köp adyer nĩ dhanö na ba bino gamö ker k’Obanga na calö athĩn, ba bino dönyö ië.”

¹⁶ Cë Yecu otingo ěthĩnö ĩ kore ěka oketho cingë ĩ wigĩ cë ölägö gum ĩ komgĩ.

Ĕcwö n’obedo alönyö

17 Ī karē na Yecu öcakö woth mērē ĩ yoo, ěcwö mörö öringö ĩ körē, cē orumo cōngē pīny ĩ nyime, ěka openyo nī, “Apwony na bër, atīm ngö ěk anwong kwö na bedo naka?”

18 Yecu ögamö nīnē nī, “Pīngö in icwoda nī abër? Ngat mörö ope na bër, na path k'Obanga kēkēn.

19 In ingeo cīk nī: ‘Kūr ineki, kūr idöny ĩ elomi, kūr ĩkwal, kūr ibed acaden mē twodo, kūr ĩbür dhanö mörö, wör apapni ěka ayani.’ ”

20 Ěcwö nī öcakö gamö nī, “Apwony, atyeko gwökö cīk nōn kibēc cakērē ĩ wang thinona.”

21 Yecu önēnō ěcwö nī, cē ömarö ěn, ěka okobo nīnē nī, “Gin mörö acēl ěnē pod orem kī bothi. Apē ěk ĩcīdh ĩcadh jamini na in iute kōdē kibēc ěka ĩmīi lim mērē both ěcan, ěka ĩbino bedo kī lönyö na thwönē ĩ wi polo. Cē ĩbin, ĩlüb kōra.”

22 Ī karē n'ěcwö nī owinyo Yecu ka ötwak nī kömanön, wangē öcakö lökērē ökö, cē ödök cen kī cwer cwiny, pīēn ěn onwongo tye kī lönyö na thwönē rwök.

23 Yecu öwīrē cē önēnō ělübörē ěka okobo nīgī nī, “Bino bedo na tēk both ělönyö mē dönyö ĩ ker k'Obanga!”

24 Ělübör Yecu obedo kī ur rwök ĩ köp mērē. Ěntö Yecu okobo dökī nī, “Ěthīnōna, bino bedo na tēk nīngö mē dönyö ĩ ker k'Obanga!

25 Bedo na yot pī kīnaga mē dönyö kī wang libira nī löönö pī alönyö mē dönyö ĩ ker k'Obanga.”

26 Ělübör Yecu dök ouro rwök ěka ötwak ĩ kin-gī kēn-gī nī, “Cē nga na dong twērö larē?”

27 Yecu önēnögī cē okobo nī, “Kī both dhanö, ba twērē, ěntö kī both Obanga, jami kibēc twērē.”

28 Petero okobo both Yecu ni, “Wan ewëkö jami kibëc më lübö kori.”

29 Yecu ögamö ni, “An akobo niwu köp adyer ni ngat mörö ope n'öwëkö pacö mërë, onyo utmego mërë onyo aya mërë onyo apap mërë onyo ëthïnö mërë onyo pwothi mërë pira ëka pi Emuth na Bër,

30 na ën ba bino nwongo jami na kadhö manön wang mia acël i karë ni, udi, utmego, ayagi, ëthïnögi, ëka jamigi kanya acël k'ayela. I karë më ajiki dhanö nön bino nwongo kwö na bedo naka.

31 Ëntö jö na pol na kobedini obedo më acaki bino gini dong cen, ëka jö n'odong cen bino tëlö anyim.”

Yecu okobo pi thöo mërë dökï

32 I karë na gin tye ka cidhö yo Jerucalem, nakun Yecu ënë ötëlö anyim, ëlëbkörë ouro rwök ëka jö n'onwongo lübö körë obedo gini ki lworö. Ën dökï otero ëlëbkörë apar ariö ki thenge ëka okobo bothgi ngö na bino timërë i kome.

33 Yecu okobo bothgi ni, “Onu ëcidhö naka yo Jerucalem, ëka Wod ka Dhanö ebino ketho örörö i kome both ëlamdhök na dito ëka epwony cik ka Muca. Gin bino ngölö thöo i wie ëka ebino miö ën i cing Erok,

34 na bino gini nywarö ën ëka ngülö laö dhögi i kome, pwodo ki del ëka eneko ën ökö. Kinge ninö adek, ën bino cer.”

Kwac ka Yakobo ëka Jon

35 Yakobo ëka Jon, awope ka Jebedayo, obino gini both Yecu ëka okobo ninë ni, “Apwony, wan

ëmītō nī ìtīm nīwa gin mörō kēkēn na wan ebino penyoni.”

³⁶ Yecu openyogī nī, “Ngō na un ìmītō nī an atīm niwu?”

³⁷ Gīn ögamō nī, “Wēk ngat acēl kī kinwa obed ì nget cingi kucem ēka ngat nōkēnē obed ì nget cingi kucam ka in ibino bedo ì then ker mē dheoni.”

³⁸ Ēntō Yecu okobo nīgī nī, “Un ba ingeo ngō na un ipenyo. Un ìtwērō modho k'ekopo mē can na an amodho kōdē, onyo ìtwērō unu batica kī koth batica mē can na an abino batica kōdē?”

³⁹ Gīn ögamō nī, “Wan ëtwērō.”

Yecu okobo nīgī nī, “Okopo na an abino modho kōdē, un thon ibino modho kōdē ēka kit batica n'ebino batica an kōdē, un thon ebino baticawu kōdē.

⁴⁰ Ēntō köp mē bedo ì nget cinga kucem onyo kucam, pathī an ënē amiō. Obanga ënē bino mīō kabedo nōn both jō na ën öyērō.”

⁴¹ Ĭ karē n'ëlübkör Yecu apar owinyo köp nī, cwinygī öwang Ĭ kom Yakobo ēka Jon.

⁴² Cē Yecu ocwodogī kībēc bothe ēka okobo nīgī nī, “Un ingeo unu nī jō n'engeogī kamē ëlöc k'Erok, löögī kī twērō ēka editegī na malō thon bedo kī twēr ì komgī.

⁴³ Un kür ibed unu nī kömanōn, ëntō ngat na mītō bedo adit kī kinwu, myero obed aticwu.

⁴⁴ Ēka ngat na mītō bedo dhanō mē acēl, myero obed opii ka jō kībēc.

⁴⁵ Naka thon Wod ka Dhanō ba obino nī ëk etii nīnē ëntō mē tic pī jūi ēka mē mīō kwō mērē mē kökö jō na pol.”

*Yecu öcangö wang Batulumayo
(Matayo 20:29-34; Luka 18:35-43)*

⁴⁶ Yecu kanya acël k'ëlübörë obino gini i Jeriko. I caa na gin dong onwongo yaa me wëkö Jeriko, lwak na pol ölübö körgi. Ecwö na wangë öthöö, na nyingë Batulumayo (wod ka Timayo) onwongo obedo i nget yoo kwaö kwac.

⁴⁷ I karë na en owinyo ni Yecu me Najaret ene tye ka wok, en öcakö redo na kobo ni, "Yecu, Wod ka Daudi, kica omaki i koma!"

⁴⁸ Jo na pol ocoko en ni ek öling ökö, entö en ömedërë ki redo rwök, "Wod ka Daudi kica omaki i koma!"

⁴⁹ Yecu ocung ëka okobo ni, "Cwod unu en obin."

Cë gin dong ocwodo athöö wang na kobo gini ninë ni, "Dii cwinyi! Yaa malö! En tye ka cwodoni."

⁵⁰ Athöö wang obolo böng mërë thenge, opye ki tyenë ëka obino both Yecu.

⁵¹ Yecu openyo en ni, "Ngö na in imitö ni atim nini?"

Athöö wang okobo ni, "Apwony, amitö wanga önën piny."

⁵² Yecu okobo ninë ni, "Apë cidhi, yeeni ocangi ökö." Cücüth wangë önënö piny ëka öcakö lübö kör Yecu.

11

*Yecu ödönyö i Jerucalem ki dheo
(Matayo 21:1-11; Luka 19:28-40; Jon 12:12-19)*

¹ I karë na Yecu k'ëlübörë dong cwök thuno i Jerucalem, gin obino i Betepage ëka Betania na cwök ki tyen Kidi me Jeituni. En ooro ëlübkörë ariö,

² ěka okobo nĩgĩ nĩ, “Apě unu ĩ pacō na tye ĩ nyimwu, ěka cūcūth na un ĩdōnyō ĩē, ĩbino nwongo unu athĩn kana n'etweo kunōn, na ngat mōrō bara ōīdhō ĩ wie anaka yam. Gōny unu ěka ikel unu kany.

³ Ka ngat mōrō openyowu nĩ, ‘Pĩngō ĩgōnyō unu kana nōn?’ Kob unu nĩnē nĩ, ‘Rwoth ēnē mītō ěka ebino dwongo ōkō pīōpīō.’ ”

⁴ Ēlūbkōr Yecu ariō ni ōcīdhō, ěka onwongo gĩnĩ athĩn kana n'etweo yōkō ĩ nget yoo ĩ dhō wangkac, cē ōgōnyō gĩnĩ.

⁵ Jō mōkō n'onwongo ocung kunōn openyogĩ nĩ, “Ngō na un itye ka tīmō, nakun ĩgōnyō unu athĩn kana nōn?”

⁶ Gĩn ōgamō kite na Yecu onwongo okobo nĩgĩ kōdē, ěka eyeo nĩgĩ mē tero.

⁷ Cē gĩn dong okelo athĩn kana both Yecu ěka ōpēdhō gĩnĩ bōng-gĩ ĩ dye ngee, ěka ēn obedo ĩē.

⁸ Jō na pol ōpēdhō bōng-gĩ ĩ dye yoo, nakun jō nōkēnē pēdhō jang yen na gĩn ōtūrō kī ĩ pwothi.

⁹ Jō n'ōtēlō anyim ěka jō n'ōlūbō kōrē oredo gĩnĩ kī wōō nĩ,
“Ocana!”

“Gum obed ĩ kom ngat na tye ka bino kī nyĩng
Rwoth!”

¹⁰ “Gum obed ĩ kom ker ka kwarō onu Daudi na tye
ka bino!”

“Ocana na tye malō ĩ wi polo!”

¹¹ Yecu ōdōnyō ĩ Jerucalem ěka ōcīdhō ĩ dyekal ōt k'Obanga. Ēn ōnēnō jami kībēc, ēntō kite n'onwongo pĩny dong cwōk cido, ēn ōcīdhō ĩ Betania kanya acēl k'ēlūbkōrē apar ariō.

Yecu ölamö yath ölam

¹² Kodiko mërë na gîn tye ka yaa wëkö Betania, kec onwongo oneko Yecu.

¹³ Ën önënö yath ölam kî cecen na pote oluk, Yecu öcîdhö më nënö ka ëtwërö nwongo nyige mörö. Ì karë na ën othuno ì thë yath, ën ba onwongo gin mörö ëntö pote kékën, piën karë nön ba obedo karë n'ölam nyak ië.

¹⁴ Cë Yecu okobo nî yath nî, “Ngat mörö myero kür dökî öcam nyigi.” Ëka ëlübkörë owinyo ën ka kobo.

Yecu ödönyö ì öt k'Obanga

(Matayo 21:12-17; Luka 19:45-48; Jon 2:13-22)

¹⁵ Ì karë na gîn othuno ì Jerucalem, Yecu ödönyö ì dyekal öt k'Obanga ëka öcakö ryëmö jö n'onwongo tye ka cadhö jami ëka ëwîl. Ën ölökö mëja ka jö na lökö cîlîng atarö ëka thene ka jö na cadhö amam.

¹⁶ Yecu ba oyeo nî ngat mörö öngöl dyekal öt k'Obanga kî jami mörö më acadha.

¹⁷ Ën okobo nîgî nî, “Cöc na Leng kobo kanya aleng nî,

“ ‘Öda ebino cwodo nî
öt më lëga pî lobo kibëc.’

Ëntö un ilökö ödökö kabedo n'ëyak pono ië.”

¹⁸ Ì karë n'ëlamdhök na dito ëka epwony cîk ka Muca owinyo gîñî ngö na Yecu ötwakö, gîn öcakö rangö kit yoo mörö na myero enek kî Yecu ködë. Gîn onwongo tye kî lworo ì kome, piën lwak onwongo uro pwony mërë.

¹⁹ Na pïny dong cido, Yecu ëka ëlëbkörë öya gïni ökö kï i Jerucalem.

*Pwony n'öya kï kom ölam
(Matayo 21:20-22)*

²⁰ Kodiko mërë na gïn tye ka wok i nget yath ölam na Yecu ölamö, ëlëbkör Yecu önënö yath ölam na dong ötal ökö anaka kï orii naka malö.

²¹ Wi Petero opo ëka öcakö kobo ni Yecu ni, “Apwony, nën! Yath ölam na in ilamö ötal ökö!”

²² Yecu ögamö ni, “Bed unu kï yee i kom Obanga.

²³ An akobo niwu köp adyer, ka ngat mörö okobo ni kidi ni, ‘Mukiri, ëk ipodh i nam,’ ëka ka ba obedo ka kalakala i cwinye ëntö yee ni ngö na ën ebino kobo bino tïmërë, ebino tïmö nïnë.

²⁴ Pï manön akobo niwu, gin mörö kékën na un ibino kwaö kï lëga, bed unu kï yee ni ityeko unu nwongo, ëka bino bedo mewu.

²⁵ Ëntö ka un itye ka lëga, më acël tïm kïca both ngat mörö kékën na köp mörö tye i kinwu ködë, ëk Apapwu na tye malö i wi polo thon ötim niwu kïca i kom balwu.”

²⁶ “Ëntö ka ba itïmö unu ni dhanö kïca, cë Apapwu na tye malö i wi polo thon ba bino tïmö kïca niwu i kom balwu.”*

*Peny i kom twërö ka Yecu
(Matayo 21:23-27; Luka 20:1-8)*

²⁷ Yecu ëka ëlëbkörë dökï odwogo gïni i Jerucalem. Na Yecu onwongo tye ka woth i dyekal öt k'Obanga, ëlamdhök na dito, epwony cïk ka Muca, ëka edong obino gïni bothe.

* **11:26** Baibul nököne ba oketho gïni tyeng ni.

²⁸ Gĩn openyo Yecu nĩ, “Koth twēr mēnē n'ōmĩō in ĩtĩmō jami nĩ kibēc? Nga n'omii twērō mē tĩmōgĩ?”

²⁹ Yecu ōgamō nĩgĩ nĩ, “An abino penyowu peny acēl. Gam unu nĩna, ēka an abino kobo niwu koth twērō na an atye ka tĩmō kĩ jami nĩ.

³⁰ Twērō ka Jon mē batica ōya kĩ ĩ polo onyo kĩ both dhanō? Gam unu nĩna!”

³¹ Gĩn ōcakō larō kōp nōn ĩ kin-gĩ kēn-gĩ ēka okobo gĩnĩ nĩ, “Ka onu ekobo nĩ ōya kĩ ĩ polo, ēn bino penyo nĩ, ‘Pĩngō ba iyee unu ĩ kom Jon?’

³² Ēntō ka onu ekobo nĩ, ‘Ōya kĩ both dhanō—’ ” (Gĩn onwongo lworō lwak, piēn jō kibēc ngeo gĩnĩ nĩ Jon adyer onwongo obedo adwarpĩny.)

³³ Cē gĩn dong ōgamō nĩ Yecu nĩ, “Wan ba engeo.”

Yecu okobo nĩgĩ nĩ, “An thon ba abino kobo niwu koth twēr mēnē n'ōmĩō an atio jami nĩ.”

12

Carolok ĩ kom epang pwodho ōlōk (Matayo 21:33-46; Luka 20:9-19)

¹ Cē Yecu ōtwak kōdgĩ kĩ carolok nĩ, “Yam onwongo tye dhanō mōrō n'ōpĩdhō ōlōk ĩ pwodho mērē. Ēn ōcēlō pwodho mērē nōn ōkō kĩ cēl, ōkũnyō bur iē mē biō pig ōlōk, ēka ōgērō pem mē kūr iē. Cē ěn ōmĩō pwodho ōlōk both epang pwodho mōrō ēka ěn ōcĩdhō ōkō ĩ lobo nōkēnē. ² Na karē mē pūdō ōlōk dong ōrōmō, ěn ooro atic mērē both epang pwodho ēk ōcĩdh ōōm nĩnē nyig ōlōk mōrō n'ōcēk.

³ Ēntō epang pwodho ōmakō atic n'onwongo eoro, cē epwodo ēka ēryēmō ōdōk cen kĩ cĩngē nono.

⁴ Won pwodho ölok ooro atic mërë nökënë dökï, ëntö epang pwodho opwodo ën i wie ëka etio tic më lewic i kome.

⁵ Won pwodho ölok ooro atic mërë nökënë dökï, ëka manön gïn oneko ökö. Ën ooro jö nökënë na pol; mökö ki kin-gï epwodogï, ëka nökënë enekogï.

⁶ “Won pwodho onwongo pod odong ki ngat acël më aora, wode n'onwongo ën marö. Më ajiki mërë ën ooro wode nakun kobo ni, ‘Gïn bino wörö woda.’

⁷ “Ëntö epang pwodho ötwak i kin-gï kën-gï ni, ‘Man ënë alak jami. Bin unu, ëk enek ën ökö, ëka jami më alaka bino bedo më onu.’

⁸ Cë gïn dong ökwanyö wod ka won pwodho ölok eneko ökö, ëka ebolo yökö ki i pwodho ölok.

⁹ “Ngö na dong won pwodho ölok bino timö? Ën bino ëka neko epang pwodho nön ökö kibëc cë mïö pwodho ölok nön both jö nökënë.

¹⁰ Un ba ikwanö unu ki i Cöc na Leng ni:

“ ‘Kidi n'egedo ökwërö ënë
ödökö kidi më gwïc öt.

¹¹ Rwoth ötimö man,
ëka obedo gïn më aura ki wang onu?’”

¹² Ëtëla k'Eyuda örangö gïni yoo më makö Yecu piën ongeö gïni ni ën onwongo ötwakö carolok i komgï. Ëntö gïn onwongo lworö lwak. Cë gïn öya öwëkö Yecu ëka öcidhö gïni ökö.

Cülö ocoro both Cija

¹³ Kinge, ëtëla dini ooro gïni Eparicayo mökö ëka jö na cwakö Erode both Yecu ëk enwong köp mörö ki i dhögë na mïö ëtwërö makö ën.

14 Gĩn obino bothe ěka okobo gĩnĩ nĩ, “Apwony, wan engeo nĩ in ibedo dhanō na kite atĩr. In ba iwēkō jō nōkēnē kobo nini ngō na myero itīm onyo ikobi. Ěntō in ipwonyo yoo k'Obanga na rwatērē kī kōp na tye adyer. Pore mē cūlō ocoro both Cija onyo pe?

15 Wan myero ěcūl ocoro onyo kūr ěcūl?”

Ěntō Yecu ongeo ōkōragĩ nōn ōkō. Ěn openyogĩ nĩ, “Pĩngō itye ka tēmōna unu? Nyuth nĩna denario ěk anēn.”

16 Gĩn okelo acēl bothe, ěka Yecu openyogĩ nĩ, “Cal ěka cōc na tye iē, obedo mē ka nga?”

Gĩn ōgamō nĩ, “Mē ka Cija.”

17 Cē Yecu okobo nīgĩ nĩ, “Eyo, mīi unu jami ka Cija both Cija, ěka jami k'Obanga both Obanga.”

Ěka gĩn obedo kī ur rwōk i kom Yecu.

Peny k'Ecadukayo i kom cer kī i thōō

18 Cē Ecadukayo, na kobo gĩnĩ nĩ cer ka jō n'ōthōō ope, obino gĩnĩ both Yecu kī peny.

19 Gĩn okobo nĩ, “Apwony, Muca yam ōmīōwa cīk nĩ ka ěcwō mōrō ōthōō n'ōwēkō dhakō mērē na ba ōnywōlō ěthīnō mōrō, ōmīn mērē na kwō myero olak dhakō nonu ěk ōnywōl ěthīnō i wi ōmīn mērē.

20 Yam onwongo utmego mōrō ute gĩn abirō. Mē acēl mērē onyomo ěka ōthōō na ba ōnywōlō athīn.

21 Ōmīn mērē mē ariō ōlakō dhakō nōn, ěn thon ōthōō ōkō na ba ōnywōlō kōdē athīn mōrō. Ěka ōtīmērē both ōmīn mērē mē adek nĩ kōmanōn.

22 Utmego abirō ni kībēc ōlakō ěn ěntō ba ōnywōlō gĩnĩ ěthīnō mōrō. Mē ajiki mērē, dhakō ni thon ōthōō ōkō.

23 Dhakö ni dong bino bedo më ka nga i karë më cer? Piën utmego abirö kibëc onwongo ölakö ën.”

24 Yecu ögamö nigî nî, “Un ba irwenyo unu pî köp nî, piën ba ingeo unu Cöc na Leng onyo tükö k'Obanga.

25 Piën ka jö n'öthöö ocer, gin ba dök nyomo onyo ënyömögi. Gin bino bedo na calö emalaika na tye i wi polo.

26 “Ëntö kobedini, köp na makö cer ka jö n'öthöö, un bara ikwanö unu kî kom cöc ka Muca, kî köp na makö bunga na lyël, kite n'Obanga okobo nî Muca ködë nî, ‘An abedo Obanga k'Abraam, Obanga ka Ica, ëka Obanga ka Jakob’?

27 Ën ba obedo Obanga ka jö n'öthöö, ëntö Obanga ka jö na kwö. Un irwenyo unu rwök.”

Cik na pîrë tük

28 Apwony cik ka Muca mörö onwongo ocung kunön winyo ngö n'onwongo etye ka larö. Ën öniang nî Yecu ögamö köp na bër, cë openyo nî, “Kî kom cik kibëc, mënë na pîrë tük rwök?”

29 Yecu ögamö nî, “Cik na pîrë tük rwök ënë man: ‘Winy unu jö më Icarael! Rwoth Obangawa ënë obedo Obanga acël ëka Rwoth.

30 Ëka myero imar Rwoth Obangani kî cwinyi kibëc, kî tiponi kibëc, kî thamani kibëc, ëka kî tüköni kibëc.’

31 Më ariö mërë pîrë tük na röm aröma: ‘Mar awodhi na calö imarö komi keni.’ Cik mörö nökenë ope na pîrë tük na löö man.”

32 Apwony cik ka Muca ögamö nî, “Eyo apwony, in ikobo na bër. In itwakö köp n'atir nakun ikobo nî Obanga tye acël këkën ëka obanga nökenë ope.

³³ Ëka an angeo nî pîrë tøk më marö ën kî cwinyi kibëc ëka kî thamani kibëc ëka kî tøkoni kibëc, ëka më marö awodhi na calö ïmarö komi keni. Man ënë pîrë tøk na löö tyër awanga ëka gin aryëda.”

³⁴ Ì karë na Yecu öniang nî apwony cîk ka Muca ögamö kî ryökö, ën okobo nîñë nî, “In ba ibor kî ker k'Obanga.”

Ëka cakërë ï caa nön ngat mörö ba dök öthamö më penyo Yecu kî peny mörö nökenë.

Meciya obedo Wod ka nga?

³⁵ Kinge na Yecu onwongo tye ka pwonyo jîi ï dyekal öt k'Obanga, ën openyogî nî, “Pîngö epwony cîk ka Muca kobo nî Meciya obedo akwar Daudi?”

³⁶ Daudi kikome ötwakö kî tøkö ka Tipo Naleng, na kobo nî,

“ ‘Rwoth okobo both Rwodha:
Bed ï nget cînga më kucem

naka ka an aketho langni ï thë tyeni.’

³⁷ Daudi kikome cwodo ën nî, ‘Rwoth.’ Ën dök twërö bedo wode nîngö?”

Jö na pol owinyo köp mërë kî yom cwiny.

³⁸ Ì karë na Yecu tye ka pwony, ën okobo nî, “Gwökërë unu kî kom epwony cîk ka Muca. Pîën gîn marö woth rimo pîny nakun ruko gîñ böng na boco ëka mitö gîñ nî jîi omothgî kî thë cuk,

³⁹ ëka marö gîñ bedo ï kabedo na bëcö më dheo ï öt Cinagoga ëka kabedo më wörö ï karama.

⁴⁰ Gîn maö udi ka mon thöö, bedo gîñ lëgö lëga na boco më nyuthere. Koth jö ni ebino pwodogî na rac rwök.”

Tyër ka dha thöo

⁴¹ Yecu obedo piny i nget kanya eketho tyër ië ki i öt k'Obanga. Ën önönö lwak ka bolo tyër i canduk lim. Ëlönyö na pol obolo lim na thwönë.

⁴² Cë dha thöo n'obedo acan obino ëka obolo ciling na nyige gin ariö.

⁴³ Yecu öcakö cwodo ëlëbkörë bothe ëka okobo ni, “An akobo niwu köp adyer, dha thöo ni n'obedo acan ënë obolo tyër i canduk lim na löö jö nökenë kibëc na tye ka miö tyërgi.

⁴⁴ Piën gin ömiö tyërgi n'ögithö gini ki kom limgi na thwönë, ëntö dha thöo ni n'obedo acan, ömiö jami kibëc n'onwongo tye bothe na myero ën ökwö ködë.”

13*Yecu okobo pi muko öt k'Obanga
(Matayo 24:1-2; Luka 21:5-6)*

¹ Na Yecu onwongo tye ka yaa ki i öt k'Obanga, alëbkörë acël öcakö kobo ni, “Apwony, nën kit na kite ni thwon ködë ëka kit na gedo mërë bëcö ködë!”

² Yecu okobo nënë ni, “Un inënö gedo na thwon ni? Ba tye kidi mörö kany n'ebino wëkö i wi wadi na ba ebino bolo ökö piny.”

Anyuth më karë më ajiki

³ Kinge, Yecu obedo piny i wi Kidi më Jeituni nakun opimere ki öt k'Obanga, Petero, Yakobo, Jon, ëka Anderiya öcakö gini penyo ën na ut kënë ni,

⁴ “Kob niwa, köp ni bino timërë awene? Ëka dökï anyuth mërë ënë ngö na bino nyutho ni köp nön cwök cobere?”

⁵ Yecu öcakö kobo nīgī nī, “Gwökërë unu, ëk ngat mörö kür öbwölwu.

⁶ Piën jö na pol bino bino gīnī kī nyīnga na bino kobo gīnī nī, ‘An ënë ën,’ ëka bino mīö jö na pol rwenyo ökö.

⁷ Ka ibino winyo unu pī lwëny ëka anīī mē lwëny, kür imīī cwinywu opodhi, koth jami ni myero ötimërë, ëntö nwongo ajiki pīny podi.

⁸ Rok bino lwëny i kom rok nökënë, ëka ker bino lwëny i kom ker nökënë. Oyeyeng bino yengo kabedo na pol ëka kec thon bino podho. Manön ënë acaki mē can na bino podho i wi lobo.*

⁹ “Ka jami ni bino timërë, myero igwökërë unu. Ebino terowu i nyim okiko both ëlöc ëka ebino pwodowu i cinagoga gīnī. Ibino cung unu i nyim ëlöc ëka i nyim rwodhi pīra na calö ecaden bothgi.

¹⁰ Mē acël Emuth na Bër myero ëtīt i wi lobo thükül n'ajiki bara othuno.

¹¹ Ka ëmaköwu, ëka ekelowu i nyim okiko, kür ipar unu ngö nī bino kobo ëntö kob unu ngö n'ebino mīöwu i caa nön, piën pathī un ënë ibino twak ëntö Tipo Naleng ënë bino twak.

¹² Omega bino mīö ömīn mërë mē aneka, apap bino mīö athīn mërë mē aneka. Ëthīnö bino jēm i kom enyodogī ëka mīö enekogī.

¹³ Jö kibëc bino dagöwu pī nyīnga. Ëntö ngat na bino cung na tēk naka i ajiki bino larë.

Can na thwönë

¹⁴ “Ëntö ka inënö unu gin mörö mē kwer na balö cwiny jö, n'ocung kanya myero kür ocung ië (ëk

* **13:8** Girik kobo nī man ënë acaki arem mē nywöl.

dhanö na kwanö öniang ië), cë jö na tye gini i Yudea myero öring gini i wi kite.

¹⁵ Dhanö na tye i wi öde kür oidhi piny, onyo ödöny i öt më kwanyö gin mörö.

¹⁶ Dhanö na tye i pwodho, kür ödök cen më ömö böngü märe.

¹⁷ Mon na yeco ëka mon na dödhö ëthino bino nenö can i karë nonu.

¹⁸ Lëg unu ëk köp ni kür ötimäre i karë më ngicö,

¹⁹ piën karë nön bino bedo thwön can na thwönë rwök na naka yam bara ötimäre i wi lobo, cakäre i karë n'Obanga ocweo ki lobo naka othuno köde tin, ëka ba bino timäre doki.

²⁰ Ka Rwoth onwongo ba öngölö ninö nön na cecek, onwongo ngat mörö acël thon ba bwöth. Ëntö pi jö n'Obanga öyërogï, ënë ömiö ën öngölö wel ninö nonu ödökö na nönök.

²¹ “I karë nön, ka dhanö mörö okobo niwu ni, ‘Nën, Meciya ene,’ onyo ni, ‘Nën, ën ëca,’ kür iyee unu.

²² Piën jö na kobo ni gin ebedo Kiricito ëka edwarpiny na twot bino bino ëka bino tio gini anyuth ëka tango na dito ëk ka twäre ëbwöl gini naka jö n'ëyërogï.

²³ Gwökäre unu dong, an atyeko dong kobo ökö niwu jami kibëc na bino timäre na karë bara örömö.

²⁴ “Ëntö i karë nonu, kinge can na thwönë nön,
“‘ceng bino cido ökö nicuc,
ëka dwe thon ba bino ryëny,

²⁵ cër bino podho gini ki i wi polo,
ëka tükö kibëc më wi polo bino yengere.’

26 “İ karë nön jö kibëc bino nönö Wod ka Dhanö na tye ka bino ki i pöl ki twër na dit ëka dheo.

27 Ëka ën bino oro emalaika më cökö jö mërë n'ëyërogî ki i thwok lobo angwën më ajiki lobo naka i ajiki më polo.

Pwony ki i kom yath ölam

28 “Nwong unu pwony ni ki i kom yath ölam. Ka jangë öcakö löth, ëka pote oduyo, un ingeo ni oro dong cwök.

29 Kömanön thon, ka inönö unu jami ni tye ka timërë, itwërö unu ngeo ni dwogo mërë dong cwök, tye i dholokek.

30 An akobo niwu köp adyer, rok më karë ni ba bino poth naka ka jami ni kibëc ötimërë.

31 Polo ëka lobo bino rwenyo ökö, ëntö köpna ba bino rwenyo.

Ngat mörö ope na ngeo nönö onyo caa

32 “Ngat mörö ope na ngeo nönö nön onyo caa nön, naka thon emalaika na tye i wi polo, onyo Wod, ëntö Apap këkën ënë ngeo.

33 Gwökërë unu! Bed n'ineno unu! Ba ingeo unu awene na karë nön bino römö ködë.

34 Bino ka Wod ka Dhanö röm aröma ki dhanö na tye ka cidhö ökö kany mörö na bor. Ën ka yaa ki i pacö, mïö twërö both etic mërë, ngat acëlacël ki tic na mëgë, nakun cikö ngat na gwökö dhö wangkac ni ëk obed na wangë thwolo.

35 “Un thon, bed unu na wangwu thwolo, piën ba ingeo unu awene na won öt bino dwogo ködë onyo bino dwogo kothyeno onyo dingwor onyo na thwön gwënö kok onyo kodiko.

³⁶ Ka ën bino dwogo athura, kür ìmĩi ën onwongwu ìnĩnõ.

³⁷ Ngõ na an akobo bothwu, an akobo nĩ jõ kibēc: ‘Bed na wangwu thwolo!’ ”

14

Yüb mẽ neko Yecu

(Matayo 26:1-5; Luka 22:1-2; Jon 11:45-53)

¹ Onwongo odong nĩnõ ariõ mẽ thuno ì Karama mẽ Poth ëka Karama mẽ Ogati na Thõbĩ ope ië. Ëlamdhök na dito ëka epwony cĩk ka Muca onwongo tye ka rangõ gĩnĩ kite na myero ëmak kĩ Yecu ì mũng ëka enek ën ökõ.

² Gĩn okobo nĩ, “Kür ëmak Yecu ì karë mẽ Karama mẽ Poth, ëk kür òmĩi jĩi okel wõõ.”

Ewiro Yecu ì Betania

³ Ì karë na Yecu tye ka cem ì öt ka Cimon n'onwongo obedo adhõbü ì Betania, dhakõ mörõ obino kĩ cupa möö narad na ngwece kur na wel mërë tæk. Ën ötürõ dhõ cupa ëka önyõ möö ì wi Yecu.

⁴ Jõ mökõ n'onwongo tye gĩnĩ kany nön ökëcõ gĩnĩ rwök ëka ötwak kën-gĩ nĩ, “Pĩngõ ëbalõ möö nĩ na ngwece kur abala?”

⁵ Onwongo myero ëcadh ì wel na kadhõ denario mĩa adek ëk ëmĩi both ëcan!” Cë gĩn ocoko dhakõ nön kĩ gero.

⁶ Ëntõ Yecu ögamõ nĩgĩ nĩ, “Wëk unu dhakõ nön kënë. Pĩngõ kara icoko unu ën? Ën ötĩmõ gĩn na bër botha.

⁷ Ēcan itye unu ködgī nīnō kibēc ēka caa mōrō kēkēn itwērō unu kōnyōgī. Ēntō ba ibino unu bedo kōda nīnō kibēc.

⁸ Ēn ōtīmō gin na ēn rōmō ēka owiro koma mē aika na caa bara ōrōmō.

⁹ An akobo niwu kōp adyer nī kanya kibēc n'ebino tītō Emuth na Bēr iē ī wi lobo thūkūl, gin na dhakō nī ōtīmō thon ebino kobo pīrē, ēk obed mē po pī ēn.”

Yuda oyeo mē ketho ōrōrō ī kom Yecu

¹⁰ Cē Yuda Ikariot, na ēnē dhanō acēl ī kin ēlūbkōr Yecu apar ariō, ōcīdhō both ēlamdhōk na dito ēk ēyūb kit na myero ēmīi Yecu bothgī.

¹¹ Ī karē na gīn owinyo ngō na ēn onwongo mītō tīmō nīgī, īgī obedo na yom, ēka ōcīkērē gīnī mē mīō Yuda Ikariot cīlīng. Cē Yuda ōcakō rangō karē na bēr na ēn ērōmō mīō Yecu bothgī.

Cem mē Poth

¹² Ī nīnō mē acēl mē Karama mē Ogati na Thōbī ope iē, nīnō na yam ēngölō k'athīn rōmō mē Poth, ēlūbkōr Yecu openyo gīnī ēn nī, “Ka kwene na in īmītō nī wan ēcīdh ēyūb nīnī cem mē Poth iē?”

¹³ Cē Yecu ooro jō ariō kī kin ēlūbkōrē nakun cīkōgī nī, “Apē unu naka ī Jerucalem, ibino unu romo k'ēcwō mōrō n'ōyēō agulu pii. Lūb unu kōrē,

¹⁴ ēka kob unu both won ōt na ēn bino dōnyō iē nī, ‘Apwony okobo nī ōt wele ute kwene ēk ēcam cem mē Poth iē k'ēlūbkōrē?’

¹⁵ Ēn bino nyutho niwu ōt na lac na tye malō, n'eketho jami kibēc iē. Kany nōn ēnē īyūb unu cem na mē onu iē.”

16 Ëlëbkör Yecu ariö öcïdhö gïñi yo Jerucalem ëka onwongo gïñi jami kibëc kite na Yecu okobo nïgi ködë. Cë gïñ dong öcakö yübö cem më Poth kunön.

17 Na dong othuno kothyeno, Yecu obino k'ëlëbkörë apar ariö.

18 Ì karë na gïñ tye ka cem, Yecu öcakö kobo nïgi nï, “An akobo niwu köp adyer nï ngat acël kï kinwu bino ketho örörö ì koma, ngat acël na tye ka cem köda.”

19 Ëlëbkör Yecu öcakö kumo, nakun ngat acëlacël penyo ën nï, “Ködë an ba?”

20 Yecu öcakö kobo nïgi nï, “Dhanö acël kï kinwu jö apar ariö, na tye ka lutho cïngë ì wal kanya acël köda.

21 Wod ka Dhanö bino cïdhö nï kömanön kite n'ëcöö ködë ì kome. Ëntö dhanö na bino ketho örörö ì kom Wod ka Dhanö bino nënö can! Onwongo bedo na bër ka dhanö nön ba ënywölö.”

Cem ka Rwoth më ajiki

22 Ì karë na gïñ tye ka cem, Yecu ökwanyö ogati, ölëgö gum ië, cë opoko ömiö both ëlëbkörë ëka okobo nïgi nï, “Gam ìcam unu. Man ënë koma.”

23 Ëka ökwanyö ekopo, öpwöyö Obanga, cë ömiögï, ëka gïñ kibëc ömadhö.

24 Yecu okobo nïgi nï, “Man ënë remona më cikërë na nyen, na bino öny pï jö na pol.

25 An akobo niwu köp adyer nï, ba dök abino madhö pig nyig ölöc, naka ì nïñö nön na an abino madhö na nyen ì ker k'Obanga.”

26 Na dong gïñ otyeko wero wer, cë öcïdhö gïñi ì wi Kidi më Jeituni.

Yecu okobo nï Petero bino kwërönë

27 Yecu okobo bothgĩ nĩ, “Un kibēc ibino unu wëköna ökö, piën yam ëcöö nĩ,
 “ ‘Abino neko akwath,
 ëka rom bino këth ata.’

28 Ëntö kinge cer, abino tëlö nyimwu më cïdhö yo Galilaya.”

29 Petero öcakö kobo nĩ, “Kadi bed nĩ jö kibēc bino wëköni ökö, ëntö an ba abino wëköni.”

30 Yecu ögamö nĩ, “Petero, an akobo nini köp adyer, tin i dyewor na thwön gwënö bara okok wang ariö, in ibino kwëröna wang adek.”

31 Ëntö Petero ocere kĩ tøk na kobo nĩ, “Kadi bed nĩ myero athöö kodi, an ba abino kwëröni na twal!” Ëka jö kibēc okwongere nĩ kömanön.

Yecu ölägö i pwodho Gethcemane

32 Gĩn öcïdhö i kabedo n'ecwodo nĩ pwodho më Gethcemane, ëka Yecu okobo both ëlübkörë nĩ, “Bed unu kany, ëk an kono acïdh alëgi.”

33 Ën ökwanyö Petero, Yakobo ëka Jon cë öcïdhö ködgĩ. Cwinye öcakö podho na lith rwök ëka kĩ kumo.

34 Yecu öcakö kobo nĩgĩ nĩ, “Cwinya cwer rwök na mïtö nekona ökö. Bed unu kany na wangwu thwolo.”

35 Yecu öcïdhö anyim na nönök, cë orumo cöngë piny oryebere ëka ölägö nĩ ka onwongo twërë, kono caa nön opoth ökö kĩ bothe.

36 “Aba, Apap, jami kibēc twërë kĩ bothi, kwany ekopo ni ökö kĩ botha, kür obed kite na an amïtö, ëntö obed kite na in ënë imïtö.”

37 Cë ën odwogo cen both ëlübkörë ëka onwon-gogĩ öninö ökö. Yecu okobo both Cimon nĩ, “Petero,

inönö ökö? Ba irömö bedo na wangi thwolo pi caa mörö acël?

³⁸ Bed unu na wangwu thwolo, lëg unu both Obanga ëk kür idöny unu i atëmatëma mörö. Cwiny mitö, ëntö kom görü.”

³⁹ Yecu öwëkögi dökï ëka öcïdhö ölëgö lëga acël nön.

⁴⁰ I karë na ën odwogo, ën dökï onwongo ëlëbkörë tye ka nönö, piën nönö onwongo ömakö wang-gi rwök. Gïn ba ongeö ngö na myero ekob gini both Yecu.

⁴¹ Yecu odwogo wang më adek mërë, cë okobo nigï nï, “Un pod inönö ëka iyweo unu? Dong örömö! Caa dong örömö. Wod ka Dhanö dong ëmiö ökö i cing ëbal.

⁴² Yaa unu malö! Eru ecidhu! Nën, dhanö na bino ketho örörö i koma dong cwök!”

Ëmakö Yecu

⁴³ Cücüth na Yecu onwongo pod twak, Yuda, ngat acël i kin ëlëbkör Yecu apar ariö, othuno ki lwak n'ömakö gini pele abadë ëka ki ludhi, n'ëlamdhök na dito, epwony cik ka Muca ëka edong ënë oorogi.

⁴⁴ Won örörö onwongo otyeko dong yübö anyuth ködgi nï: “Ngat na an abino nödhö leme, ën ënön, mak unu ën ëka iter igwök unu na bër.”

⁴⁵ Yuda öcakö cidhö ökö cücüth both Yecu ëka okobo nï, “Apwony!” Cë önödhö leme.

⁴⁶ Gïn dong öcakö podho i kom Yecu, ëka ëmakö ën.

⁴⁷ Ëntö dhanö mörö acël n'onwongo ocung i nget Yecu öcakö wödhö pala abadë mërë, cë otongo ki ith atic k'Alamdhök na Dit naka onguno ökö.

48 Yecu openyogī nī, “Ibino unu botha kī pele abadē ēka kī ludhi mē makōna calō an abedo ayak?

49 Nīnō kī nīnō an abedo kodwu ī dyekal ōt k'Obanga nakun apwonyo, ngō n'ocerowu makōna? Ēntō jami nī kībēc tye ka tīmērē mē cobo ngō na Cōc na Leng kobo ī koma.”

50 Cē ēlūbkōr Yecu kībēc ōwēkō ēn ēka ōngwēcō gīnī ōkō.

51 Awobi mōrō n'orwao bōngū kēkēn ī kome, onwongo tye ka lūbō kōr Yecu. Ī karē na lwak ōtēmō mē makō ēn,

52 awobi nī omukere kī ngwēc cē ōwēkō bōngū mērē ī cīng-gī ēka ōngwēcō kotula.

Yecu ī nyim athuko mē ōd okiko k'edong

53 Gīn otero Yecu both Alamdhōk na Dīt, ēka ēlamdhōk na dito kībēc, edong ēka epwony cik ka Muca obino gīnī kanya acēl.

54 Petero obedo ka lūbō kōr Yecu kī cečen naka othuno kōdē ī dyekal k'Alamdhōk na Dīt. Ēn obedo kanya acēl k'ēkūrpīny, nakun oo mac.

55 Ēlamdhōk na dito, ēka athuko mē ōd okiko k'edong kībēc onwongo tye gīnī ka rangō caden mōrō na rōmō mīōgī neko Yecu. Ēntō ba onwongo gīnī gīn mōrō.

56 Ecaden na pol obedo ka twakō kōp twodo ī kom Yecu ēntō kōpgī ba ōrwatērē.

57 Mē ajiki mērē, jō nōkēnē ōya malō cē ōtwakō gīnī caden mē twodo nī,

58 “Wan ewinyo ēn tye ka kobo nī, ‘An abino muko ōt k'Obanga nī n'ēyūbō kī cīng dhanō, ēka abino gērō nōkēnē pī nīnō adek, na ba ēgērō kī cīng dhanō.’ ”

⁵⁹ Kadī bed nī kōmanōn, kōp mē caden na gīn ötwakö ba örwatērē.

⁶⁰ Alamdhök na Dit öya malö cē ocung i dyeregī ëka openyo Yecu nī, “Eyo, in ba itwērö gamö kōp ni kibēc? Ngö na in itwērö kobo i kom gīn n'ekobo i komi?” ⁶¹ Ëntö Yecu öling alinga ba ögamö. Cē Alamdhök na Dit dōkī openyo ën nī, “In ënē ibedo Meciya, Wod k'Obanga n'ewörö?”

⁶² Yecu okobo nī, “An ënē ën. Ëka ibino nēnō unu Wod ka Dhanö n'obedo i nget cing Won Twēr kucem ëka dōkī tye ka bino kī i pöl mē polo.”

⁶³ Alamdhök na Dit öyēcö böng mērē ëka okobo nī, “Pīngö onu pod dōkī ëmitö caden nökēnē?”

⁶⁴ Un iwinyo unu kite na ën öyanyö k'Obanga ködē. İthamö unu nīngö iē?”

Gīn kibēc öngölö nī, “Ën opore mē thöö!”

⁶⁵ Jö nökēnē öcakö ngülö laö dhögi i kome, nakun eumo wangē ökö cē ëbapö, n'ekobo nīnē nī, “In ibedo adwarpīny, tuc nīwa!” Ëka ökürpīny ökwanyö Yecu cē epwodo.

Petero ökwērö Yecu

⁶⁶ İ karē n'onwongo Petero tye pīny i dyekal, atic k'Alamdhök na Dit mörö n'obedo nyakö obino.

⁶⁷ İ karē na ën önēnō Petero tye ka oo mac, ën öripö Petero na cwök ëka okobo nī, “In thon onwongo itye kī dhanö nōn n'öya kī i Najaret, ën Yecu.”

⁶⁸ Ëntö Petero ökwērö ökö na kobo nī, “An ba angeo ngö na in itye ka twakö,” cē öcīdhö ökö yo dhö wangkac, ëka thwön gwēnō öcakö kok.

⁶⁹ İ karë na nyakö nön n'obedo atic önönö Petero ocung kunön dökî, ën öcakö kobo both jö nökenë nî, “Ëcwö ni obedo awodhgî acël!”

⁷⁰ Ëntö Petero ökwërö ökö dökî.

Kinge na nönök jö mökö n'onwongo ocung gîñî i nget Petero öcakö kobo gîñî nî, “Adyer in ibedo awodhgî acël, piën in ibedo dhanö më Galilaya.”

⁷¹ Petero öcakö alem i kome kënë nakun kwongere nî, “An ba angeo ëcwö ni na un itye ka twakö köp i kome”

⁷² Ëka cücüth thwön gwönö okok wang më ariö. Cë Petero opo i köp na Yecu okobo nîñë nî, “Na bara thwön gwönö okok wang ariö, in ibino kwëröna wang adek.” Ëka öcakö koko rwök.

15

Yecu i nyim Pilato

(Matayo 27:1-2; 11-14; Luka 23:1-5; Jon 18:28-38)

¹ Keko cön, ëlamdhök na dito, mëd k'edong, epwony cîk ka Muca, ëka athuko më öd okiko k'edong kibëc öyübö gîñî köp kanya acël. Gîñ otweo Yecu cë etero ökö ëka ëmïö both Pilato.

² Pilato öcakö penyo Yecu nî, “In ënë rwoth k'Eyuda?”

Yecu ögamö nî, “Eyo, obedo kite na in ikobo ködë.”

³ Ëlamdhök na dito odotho Yecu kî kwa adoth na pol.

⁴ Cë Pilato dökî openyo Yecu nî, “In ba itwërö gamö peny? Nën lwak köp na pol n'edothi ködë.”

⁵ Ëntö Yecu ba ögamö gin mörö, ëka Pilato obedo kî ur rwök.

Ēngölö köp mē thöō nī Yecu

⁶ Ī karē mē Karama mē Poth kibēc, Pilato onwongo marö gönyö amabuc acël na lwak nwongo ökwaö.

⁷ Ī karē nön, ěcwö mörö onwongo tye na nyिंगē Baraba, na yam etweo ĩ buc ĩ kin jö n'öjēm n'oneko gini jii ĩ karē mē jēmgi nön.

⁸ Lwak öcakö cidhö both Pilato mē penyo ěn ěk ötim kite na ěn önaa timö ködē.

⁹ Pilato openyogi nī, “Un ĩmitö nī agöny niwu rwoth k'Eyuda?”

¹⁰ Pilato okobo nī kömanön piën ěn onwongo ongeö nī ělamdhök na dito okelo gini Yecu pi nyeko.

¹¹ Ēntö ělamdhök na dito öcüpö gini lwak ěk ömii Pilato ögöny Baraba nakaka Yecu.

¹² Pilato öcakö penyogi nī, “Ngö na myero an atim ki ngat na un icwodo nī rwoth k'Eyuda?”

¹³ Lwak öwöö gini nī, “Gur ěn ĩ kor yath ariä!”

¹⁴ Ēka Pilato dökī openyogi nī, “Pिंगö kara, ötimö ngö na rac?”

Ēntö lwak öwöö gini ki redo rwök nī, “Gur unu ěn ökö ĩ kor yath ariä!”

¹⁵ Pilato onwongo mitö yomo cwiny lwak, cē ögönyö Baraba nigī. Ēn ömiö twerö nī ěk epwod Yecu ki del ěka egur ĩ kor yath ariä.

Acikari önywarö Yecu

¹⁶ Acikari otero gini Yecu naka ĩ dyekal k'alöc (n'ecwodo nī Praitorion) ěka ocwodo gini lwak acikari kibēc kanya acël.

¹⁷ Gīn öcakö ruko Yecu ki böngü na kwar ěka etweo tok öküdhö öthac, cē ěrwakö ĩ wie.

18 Cē gīn öcakö motho ën nī, “Örēm ba, rwoth k'Eyuda!”

19 Acikari opwodo gīnī wi Yecu kī lūth, öngölö gīnī laö dhögī ī kome, ëka orumo gīnī cōng-gī pīny mē wörö ën mē anywar.

20 İ karē na gīn dong önywarö Yecu, ökwanyö gīnī böngü na kwar ökö kī ī kome ëka ëdwökö böng mērē ī kome. Cē gīn dong otero Yecu yökö ëk egur ī kor yath arĩa.

Eguro Yecu ī kor yath arĩa

21 Ėcwö mörö mē Cirene na nyīngē Cimon apap k'Alegijanda ëka Rupo, onwongo tye ka wok nakun öya kī kin pacö ëka acikari ödiö ën mē tingo yath arĩa.

22 Gīn otero Yecu ī kabedo n'ecwodo nī Gölgötha, na tyēn köp mērē nī, “Kabedo mē Cogo Wic.”

23 Cē acikari öcakö mīö Yecu köngö ölöc n'erubo kī yath mūra,* ëntö Yecu ökwörö madhö ökö.

24 Gīn oguro Yecu ī kor yath arĩa ëka opoko gīnī böng mērē ī kin-gī nakun ebolo kwir ëk ënën böngü na ngat acēlacēl bino tero.

25 Eguro Yecu ī kor yath arĩa caa adek mē kodiko.

26 Gīn n'ēcöö na nyutho köp n'edotho ën iē kwanērē nī, “RWOTH K'EYUDA.”

27 Eguro Yecu kanya acēl k'ëyak arīö, dhanö acēl kucem ëka acēl kucam. 28 Man ömīö Cöc na Leng ocobere kakarē nī, “Ėkwanö ën ī kin ëbal.”†

29 Jö n'onwongo tye ka wok ī ngete, obedo gīnī ka yanyö ëka nywarö Yecu, nakun yengo wigī na

* 15:23 Mūra obedo yath n'erubo kī köngö ölöc n'ēmīö both dhanö n'eguro ī kor yath arĩa mē kweeno arem. † 15:28 Baibul nökënë ba cöö tyeng nī.

kobo gīnī nī, “Onye, in n'imuko öt k'Obanga ökö, cē igērö pī nīnō adek kēkēn,

³⁰ larē keni, idhi pīny kī i kor yath ariā!”

³¹ I kite acēl nōn, ēlamdhök na dito ēka epwony cīk ka Muca önywarö gīnī Yecu i kin-gī kēn-gī nakun kobo gīnī nī, “Ēn ölarö jö nökēnē, ēntö ba twērö larē kēnē!

³² Wēk Kiricito, Rwoth mē Icarael, oidhi pīny kī i kor yath ariā, ēk ēnēn ēka eyee.” Jö n'eguro kī Yecu thon öcakö gīnī yanyö ēn.

Thöö ka Yecu

³³ I caa abicēl mē kiceng, pīny ocido ökö na cöl nicuc i wi lobo kībēc naka othuno caa abungwēn.

³⁴ Ēka i caa abungwēn, Yecu öcakö koko kī dwön na malö nī, “Eloi, Eloi, lama cabaktani?” Na gönyö nī, “Obangana, Obangana, pīngö iwēka nī kōman?”

³⁵ I karē na jö n'ocung na cwök owinyo, gīn okobo nī, “Winy unu, ēn tye ka cwodo Eliya.”

³⁶ Ēcwö mörö acēl öcakö ngwēc, ēka ökwanyö amor, olutho i köngö öläk na wac, cē öröpö i wi yath atad ēka ömiö both Yecu nī ēk ömadhi. Ēn okobo nī, “Kür unu, eru ēnēn ka Eliya twērö bino kwanyö ēn ökö pīny!”

³⁷ Yecu dökī okok kī dwön na malö cē öthöö ökö.

³⁸ Cē böngü ēcēngē na tye i öt k'Obanga öcakö yēc opokere iē ariö, kī malö naka pīny.

³⁹ Adit acikari n'onwongo ocung na cwök i nyim Yecu, owinyo redo ka Yecu ēka önēnō kite n'öthöö ködē, cē ēn okobo nī, “Adyer dhanö ni onwongo obedo Wod k'Obanga.”

⁴⁰ Mon mökö onwongo tye gīnī kunön, nakun röpö gīnī kī cecen. Kī kin-gī onwongo obedo Maria

më Magadala, Maria (aya ka Yakobo na tidi ëka Yoce), ëka Calume.

⁴¹ Gïn obedo ka lübö kör Yecu anaka ki i Galilaya, ëka gïn obedo ka kõnyö ën thon. Mon nökënë na pol n'onwongo owotho ködë më bino i Jerucalem onwongo thon tye kunön.

Eiko kom Yecu i lyël

⁴² Onwongo obedo Nïnö më Yübërë (manön nïnö na Cabit k'Eyuda bara örömö.) Na dong piny cwök cido,

⁴³ ëcwö na nyingë Yocepu më Arimethea obino, ën onwongo obedo dhanö na dit më öd okiko, ëka ën onwongo kürö Ker k'Obanga më bino. Ën öcïdhö both Pilato ki tæk cwiny më kwaö kom Yecu.

⁴⁴ Pilato obedo ki ur më winyo ni Yecu dong öthöö ökö. Ën ocwodo adit acikari, cë openyo ka Yecu öthöö ökö.

⁴⁵ I karë na Pilato öniang ki both adit acikari ni ötimërë ni kömanön, ën ömiö kom Yecu both Yocepu.

⁴⁶ Yocepu öwölö böngü na leng. Cë ökwanyö kom Yecu ökö piny ki kor yath ariä, oboo i böngü, ëka opyelo i bur lyël n'egworo i kidi, cë ölorö kidi i dhö bur lyël ëka oloro dhögë ökö. ⁴⁷ Maria më Magadala ëka Maria aya ka Yoce önenö gini kakwene n'onwongo eiko ën ië.

16

Cer ka Yecu

(Matayo 28:1-8; Luka 24:1-12; Jon 20:1-10)

¹ I nïnö na lübö Cabit k'Eyuda, Maria më Magadala, Maria aya ka Yakobo, ëka Calume öcïdhö gini

më wilö möö na ngwece kur ëk ëcïdh gïni më wiro kom Yecu.

² Kodiko cön i nïnö më acël më cabït, kinge na ceng dong oduyo, gïn öcïdhö i lyël.

³ Gïn öcakö penyere gïni kën-gï kï i wanga yoo nï, “Nga na bino thwaro nï onu kidi kï i dhö bur lyël?”

⁴ Ëntö i karë na gïn othuno, önënö gïni lyël ëka önënö gïni kidi n'onwongo thwönë, dong ethwaro ökö thenge.

⁵ Na gïn dönyö i lyël, önënö gïni awobi mörö n'oruko böngü na tar n'obedo kï kucem, ëka obedo gïni kï lworö rwök.

⁶ Ëntö ën okobo nï, “Kür ibed unu kï lworö, un itye ka rangö Yecu më Najaret, n'onwongo eguro i kor yath ariä. Ën ope kany! Ën ocer ökö kï kin jö n'öthöö! Nën unu, kany ënë onwongo epyelo kome ië.

⁷ Ëntö apë ëk ikob unu n'ëlübkörë ëka Petero nï, ‘Yecu bino tölö nyimwu më cïdhö yo Galilaya. Ibino nënö unu ën kï kunön, kite na yam ën okobo niwu ködë.’ ”

⁸ Cë mon oduyo yökö kï i lyël, öcakö gïni ngwëc kï myël kom ëka lworö na ba okobo gïni gin mörö both ngat mörö këkën, piën lworö onwongo ömakögi rwök.

Yecu onen both Maria më Magadala

⁹ I karë na Yecu ocer kï i lyël kodiko cön i nïnö më acël më cabït, ën öcakö nen both Maria më Magadala, dhakö na ën onwongo öryëmö cene abirö kï i kome.

¹⁰ Ën öcïdhö both ëlübkör Yecu n'onwongo tye ka kwero cöla ëka kok gïni.

11 Ëntö i karë na gîn owinyo nî Yecu tye na kwö, ëka Maria önënö ën, gîn ba oyee köp mërë.

Yecu onen both ëlëbkörë ariö

12 Kinge, Yecu onen both ëlëbkörë ariö i kite na path n'onwongo gîn tye ka cidhö yo kin pacö.

13 Gîn ödök cen më kobo both ëlëbkör Yecu nökenë, ëntö ngat mörö ope n'oye köpgi.

Yecu onen both ëlëbkörë apar acël

14 Kinge, Yecu onen both ëlëbkörë apar acël i caa n'onwongo gîn tye ka cem. Ën ocokogî piën gîn onwongo ope kî gen ëka pî nwang cwinygî piën gîn ökwërö yee köp ka jö n'önënö ën kinge cer mërë kî i kin jö n'öthöö.

15 Yecu okobo n'ëlëbkörë nî, “Apë unu i wi lobo kibëc ëka itit unu Emuth na Bër both dhanö kibëc.

16 Dhanö mörö na bino yee ëka ebatica ën, bino larë, ëntö dhanö na ba bino yee, ebino ngölö nînë köp.

17 Anyuth ni bino nen kî both jö na yee, gîn bino ryëmö cene kî nyïnga. Gîn bino twak kî lëb na nyen.

18 Gîn bino makö thwol kî cïng-gî, ëka ka gîn ömadhö gîn mörö na neko dhanö, cë ba bino timögi na rac. Gîn bino ketho cïng-gî i kom etwoe ëka bino cang gîni.”

Yecu öidhö i wi polo

19 Kinge na Rwoth Yecu ötwak ködgî, ëkwanyö cë etero i wi polo ëka ën obedo i nget cïng Obanga kucem.

20 Cë ëlëbkör Yecu öcidhö ëka ötitö gîni köp i kom Yecu i kabedo kibëc. Rwoth otio ködgî ëka omoko köp mërë k'anyuth n'ölübö körë.

Leb-Thur

Thur: Leb-Thur (New Testament+) for Uganda

copyright © 2024 Wycliffe Bible Translators, Inc.

Language: (Thur)

Translation by: SIL Uganda

Contributor: Wycliffe Bible Translators, Inc.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-10

PDF generated using Haiola and XeLaTeX on 10 May 2025 from source files dated 10 May 2025

61e7f4da-dc0f-50a1-9dae-64ee1b392d80